

Je'ej ti ye'ej tyo'yú'xaca' a'íjna i San Pablo a'íjma jimi i maj Roma jo'cháatima'caa

Pablo pu hua'tyojtye'

¹ Nyáaj nu Pablo yajá'muatyojtye', i nyaj jahuiire' i Ciríistu' ti Jesús pué'een, a'íi pu na'antyíhuoj, nyej nyij a'yan huárinyij je'ej ti a'íin tyinaata'íj, ajta na'vá'jaj nyej nyij huo'té'exaatye'en i nyúucaria'ra' i Dios.

² Jájcuaj imuáj pu i Dios a'yan tya'tóoratziiri' ti tyámua' tyihuo'tá'an, a'íj mu jin a'yan tyo'tyéyu'xaca' a'íjci jitze i yu'xarij ti'ij ityájma jimi huatyá'itzeere'en.

³ A'íjna i nyúucarij, a'íj pu á'xaj i Ciríistu' ti jí'yojra' ajta tavástara' pué'een, ti ajta a'yan tyu'nié'huaca' ti'ij tyéviij, a'íj ti jitze eeráma'can i David.

⁴ Ajta ti'ij huatájuuriaca', Dios pu a'yan jaata-mua'aj tijin nyiyóoj pu pué'een, ajta jaatá' ti'ij néijmi'i jin antyúumua'reeriaj, ji'nye a'íj pu jitze aróoca'nyajca'aj i júuricama'ra' i Dios.

⁵ Ciríistu' jimi nu ja'ancuriáa' a'íjci ti jin i Dios tyámua' tyinaatá', nyej nyij jitzán ma'can jó'me'en hua' tzajta' i tyeítýee, mata'aj mij néijmi'que' i cháanacaj japua ja'antzaahuatye'en majta a'íj ará'astej.

⁶ Matí'ij mana'aj a'íimaj, mua'aj xu siajta hua' jitze ajtyáma'can mu siaj Roma ja'chej. Dios

pu jéehua já'muaxie've', ajta jamua'antýíhuoo siaj sij jitzán ajtyama'cáantaj xá'ra'nyij i Jesús ti ajta Ciriistu' pué'een ajta siaj sij hua'ajtyáanaxca a'íjma i maj tyá'tzaahuatye'.

⁷ Che' i Dios, ajta i tavástara' a'íjna i Jesús ti ajta Ciriistu' pué'een, miche' a'ín tyámua' tyajamuaatá'an majta tyámua' jamuáa'uurej.

Pablo pu jaxie've' ti huojo'vá'muaarej a Roma

⁸ Anaquéecan jime', a'íj nu jitze ma'can i Ciriistu' tyámua' tya'tá'caa i Dios ja'mua jime', ji'nye néijmi'que' i cháanacaj japua mu meríj jamua'reej siaj tyá'tzaahuatye'.

⁹ A'íjna i Dios, i nyaj jahuiire' néijmi'i jime' i nyaxiéjnyu'caa nyahua'ixáatya'aj i nyúucaria'ra' i yójra', a'íi pu jamua'reej nyaj a'náj tina'aj jamua'tamuá're'rii,

¹⁰ a'yaa nu a'náj tina'aj tyá'huavíj i Dios, tipua'aj a'yan tyinyatá'care'en juxié'vi'ra' jime' nyej nyij jamojo'vá'muaarej.

¹¹ Ji'nye jéehua nu já'muasejramu' nyata'aj nyij ca'nyíjra'aj jamuaata'an, ajta siaj sij a'íjci jitze aróoca'nyej i júuricama'ra' i Dios, siata'aj sij jéetze' tyámua' naa tyityaaju'un,

¹² tyata'aj tyij ca'nyíjra'aj huatáta'an síj ajta síj, a'íjci jime' tyaj taxa'aj tyá'tzaahuatye' taxié'vi'ra' jime'.

¹³ A'yaa nu tyá'xie've' nye'ihuáamua', siaj jáamua'reej nyaj mue'tíj jaaxá'pui'intarej nyaj a'áa ja'tanyéj ja'mua jimi, ajta nyati'íjta jaaxá'pui'intare'en nyaj a'yan huárinyij, tyi'tíj pu je'ej rinyij nyej nyij quee a'áa jó'me'en. A'yaa nu tyá'xie've' nyaj a'yan cha'taj nyana'aj

tyaamue'tin ja'mua jimi i nyaj jin tyu'tátuiire'en i Dios jimi, je'ej nyaj nyeríj tyaamue'tij séecan jimi i tyeítyee i maj séej chuéj japua jo'cháatimee.

¹⁴ A'yaa nu nyeríj a'íjci jin tya'tányaraj nyej nyij tyihuo'té'exaatye'en a'íjma i maj Grecia já'ma'can, nyajta a'íjma i maj séej chuéj japua já'ma'can, tipua'aj jéehua maj tyojó'itej nusu i maj quee tyojó'itej;

¹⁵ a'íj nu jin jéehua jaxie've' nyej nyajta jamuaaté'exaatye'en i nyúucarij i ti jin i Dios ja'mua japua huatányuunij, mua'ajmaj mu siaj Roma ja'chej.

I ti jin uhuájca'nyej i nyúucaria'ra' i Dios

¹⁶ Capu nyetyevi'raste' a'íjna i nyúucarij, ji'nye a'íi pu pu'éen i Dios ti jin uhuájca'nyej ta'aj ij néijmi'caa huáhuire'en i maj tyá'antzaahuatye'sij, anaquéej mu a'íimaj i maj Israel jitze ajtyáma'can, majta je'en i maj séej chuéj japua já'ma'can.

¹⁷ Ji'nye a'íjna i nyúucarij jitze pu séejre' ti i Dios tyámua' ta'uurej, a'íjci jime' i tyej tyá'tzaahuatye', ti'ij na'aj tyo'huatyóochesij ajta jusén jime'. A'yaa pu tyé'yu'si' i yu'xarij jitze tijin: “A'íjna i ti naa tyí'tyevij, a'íi pu júurij huatyá'itzeere'ej a'íjci jime' i ti tyá'tzaahuatye'.”

I maj jin já'itzeere' i Dios jimi

¹⁸ Ajta i Dios pu jaséjrataj i ti jin nyú'camui' puéjtzij hua'tá'caria'aj néijmi'caa i tyeítyee i maj je'ej pua'aj tyí'tyetyeityee, i maj quee tyi'tá'caa ti séjre'ej a'íjna i ti ji'r'é'can jime'.

19 Ajta i Dios ti jimi i'rij ti a'tij jáamua'tyij a'ñi mu merij jamua'tyej, ji'nye Dios pu jusíij arí huo'taséjra.

20 Ti'ij na'aj i Dios tyeetyátaahuaca' i cháanacaj i ti yujo'vá'ca'aj, tyámua' pu naa tyé'miteere' je'ej ti een i muárie'ria'ra', ajta quee a'náj huatyápua'rij ti'ij na'aj yutij jo'que'tij ja'mej, ji'nye a'yaa pu tyí'sejre' je'ej ti een i Dios. A'ij pu jin quee je'ej tyí'rij ti a'tij séej jitzán tyo'ojpuá'ritye'en.

21 Tyij majta merij jamua'tyej i Dios, camu jaatyátzaahuatyej, camu majta tyaatatyójtzi'rej. Sulu a'ij mu jitze ucájrurij maj a'ijci jitze tyú'mua'tyij i mua'tzíira'aj tíquee tyi'tij huiire', capu ij che' huatá'riitarij ti tyámua' tyi-huo'támiteeraste'en tzáahuatyira'aj jime'.

22 A'yaa mu tyí'xajtaca'aj tijin tyámua' tu metyityoomuámua're', ajta a'yaa pu tye'rájraa maj jéetze' quee ma'umuámua'ria'aj muá'raa.

23 Ji'nye mu'rij seequéj tyú'ruuj séecan mu'uj mij pujmua' najchej tíquee Dios pué'een, ti a'yan huasé'rin ti'ij tyévi, na'riij ti'ij pína'aj, nusu tyi'tij ti muáacuacaa iira'íicajmee ca' tyi'tij ti huacínyeji'ij.

24 A'ij pu jin i Dios mahuoohuá'xij a'íjma i maj je'ej pua'aj merij tyityo'cájrurij, majta tyévi'si'ricij i juxa'aj tye'ityee jamuán.

25 A'ñi mu yo'huá'xij i ti ji'récán jime' i Dios jimi, a'ij mu jéetze' á'astijre' i ti hue'tzij, majta a'ij jimi jutzaahuatye' i maj tyí'najchej i Dios ti tyú'taahuaca', camu che' a'ijci i Dios i ti néijmi'i tyú'taahuaca', tyej tyij tyámua' tyaatá'an ti'ij

na'aj jusén jime'. Che' a'yan atyojo're'n'yej.

26 A'íj pu jin i Dios a'yan metyihuohuá'xij mata'aj mij tyévi'si' huataséj're'en. Majta a'íimaj i maj úucaa, a'íi mu jaatapuá'citaca' maj antyóonaxcaj i tyétyacaa jamuán, mej mij see-quéj huárinyij je'ej tiquee i Dios éenye'que' huo'tyájtó.

27 Majta a'íimaj i tyétyacaa, a'yaa mu cha'taj mana'aj tyaatapua'citaca' mej mij quee che' majta hua'antyáanaxcaj i úucaa je'ej ti i Dios tyihuo'tyájtóo. A'yaa mu huaríj mej mij juxa'aj tyétyacaa jamuán huóoxana'cire'en a'íjci jime' i ti je'ej pua'aj een ti hua' tzajta' eerányinyii, a'yaa mu mij tya'ajpuéjtzij a'íjci jime' i maj huápu'i'ij je'ej pua'aj ricij.

28 Majta quee jaaxie've' maj jáamua'tyij i Dios, a'íj pu jin a'yan metyihuohuá'xij, mej mij a'yan huárinyij je'ej tiquee tyi'tyéevijti

29 Néijmi'i pu hua' jimi séej're' i ti je'ej pua'aj een, a'íi mu juxana'cire', majta jéehua tyí'nyacua'aj, je'ej mu pua'aj tyí'tyetyeityee. A'íi mu majta tyú'jaaxiejvi', majta tyí'tyacui'caa, jéehua mu majta jutya'racaa, majta jujíimua'aj jucuanamuajcaa, majta mu je'ej pua'aj huá'uurej i ju'ihuáamua', majta je'ej pua'aj tyí'xaxa'aj.

30 Je'ej mu pua'aj tyihuá'xaj i juxa'aj tyeítyee, majta jájcha'íire' i Dios, majta hua'xaahuaj i juxa'aj tyeítyee, majta óotzaahuatye', majta hue'tzij jutaavij're', majta quee huá'tzaahuatye' i juhuásimua'.

31 Camu jaxie've' maj tyihuojo'itéej muá'ra'nyij, camu ja'rá'astyaa i junyúucaa,

camu hua'xie've' i jutyéityeristyamua', camu tyá'cu'vej.

³² Máamua'reej je'ej ti Dios arí tyaaxá'pui'intarej tijn néijmi'i mu cui'nyij i maj a'yan ricij, capu hua' jitze juxie've', móoche' mu a'yan ricij, ajta pu naa hua'asej maj séecan a'yan cha'taj mana'aj rijcaj.

2

Dios pu tzáahuatyi'ra'aj jin huá'xijtye'en i tyeítyee

¹ Típua'aj muáaj a'tíj jitzán petyí'pua'ritye'ej, capu i'rij paj a'yan tyu'taxáj yee capáj muáaj tyi'tíj jin je'ej pua'aj huaríj, ji'nye muáaj paj a'yan cha'taj pana'aj je'ej pua'aj tyi'tyía'cha'ij mati'ij a'íimaj.

² Tyajta a'yan tyá'mua'reej ti i Dios tzáahuatyi'ra'aj jin huá'xijtye'en a'íijma i maj je'ej pua'aj tyityetyúucha'ij.

³ Ajta muéetzij jime', mu paj séecan á'xijtye' pajta a'yan cha'taj pana'aj je'ej pua'aj tyi'tyía'cha'ij, capáj a'yan tyí'mua'ajcaj yee capu nyéetzij i Dios puéjtzij naatá'sij.

⁴ Muáaj paj jaatyáxaahuataca' a'íjci i Dios ti jéehua tyámua' tyimuatá'caa, ajta muá'cu'vej, ajta a jime' tyi'ijchó've', ajta muéetzij quee je'ej muá'miteeraste' ti i Dios tyámua' tyimuatá'caa pej pij jitzán ajtyáma'cantaj puá'ra'nyij.

⁵ Pajta muáaj, capáj ma'úumua'rej a'íj paj jin quee jaxie've' paj ja'antzaahuatye'en i Dios, a'yaa pej pij jéehua tyi'tyía'asiiri'tze'sij i puéjtzij ti'ij a'ájna atyojo're'nyej a'náj ti i Dios

a'yan huataséjre'sij tì'ij néijmi'caa to'xíjtye'en
tzáahuatyí'ra'aj jìme',

⁶ ajta je'en a'yan tyihuo'tá'an séej ajta séej je'ej
tì síj tyí'tíj jìn huaríj.

⁷ Dios pu huo'ta'sij maj jusén jìn júurij
muá'ra'nyij a'íimaj i maj xá'puí' huaríj, majta
jajchó'va'ca'aj tì Dios tyámua' tyihuo'tá'an,

⁸ ajta i Dios pu nyu'camuí'ij puéjtzij huo'ta'sij
a'íjma i maj je'ej pua'aj tyityetyúucha'ij, i maj
a'íjna jitze jutyamua've' i tì je'ej pua'aj een.

⁹ Jéehua mu jajpuéetzij muá'ju'un a'íimaj i maj
je'ej pua'aj tyityetyúucha'ij, anaquéej mu a'íimaj
i maj Israel jitze ajtyáma'can, majta je'en a'íimaj
i maj séej chuéj japua jo'cháatimee.

¹⁰ Ajta i Dios pu tyámua' tyihuo'tyátoosij
a'íimaj i maj tyámua' tyityetyúucha'íj,
ajta huo'tyátzaahuatye'sij, ajta tyámua'
tyihuo'tyéjeevij jusén jìme', anaquéecan a'íjma
i maj Israel jitze ajtyáma'can, ajta je'en a'íjma i
maj séej chuéj japua já'ma'can.

¹¹ Ji'nye néijmi'i mu juxa'aj mana'aj een i Dios
jimi.

¹² Néijmi'i i maj quee xá'puí' ricij majta
quee a'náj ja'ancuriáa' i nyúucarij Moisés
tì jaaxájtaca', a'yaa mu majta tyí'tyacuí'nyij,
majta a'íimaj i maj juxana'cìre', a'yan
metya'mua'réeriaj je'ej tì tyaaxájtaca' i Moisés,
a'íi pu i nyúucarij huá'xíjtye'en.

¹³ Ji'nye camu tyámua' een i Dios jimi a'íimaj i
maj janamuj mana'aj i nyúucarij, sulu a'íimaj i
maj a'yan ricij je'ej tì tyá'xaj i nyúucarij.

¹⁴ Ji'nye a'íimaj i maj séej chuéj japua

já'ma'can, i maj quee a'náj ja'ancuriáa' i nyúucarij, a'yaa mu tyá'astijre' je'ej maj jujímua'aj mana'aj tyéejtyoovej i jutzájta', a'íj mu jin jujímua'aj tyúu'ijtye' i junyúucaa jime',

¹⁵ a'íimaj mu a'yan tyúusejrataj je'ej ti tyá'xie've' i nyúucarij i maj jin tyí'ijta, a'íi pu hua' tzajta' séejre'. A'íi pu ajta jaséjrataj i maj jin ma'umuámua're', ajta i hua'mua'tziira'aj pu'ij hua' jitze tyo'ojpuá'ritye'ej nusu hua' japua huatányuusij,

¹⁶ a'ájna xicáara' jitze ti'ij i Ciríistu' huá'xijtye'en i Dios jitze ma'can, néijmi'caa i tyeítyee je'ej maj tyi'tíj huáruuj avíitzij jime', ajta i nyúucarij jitze ma'can i nyej nyáaj jamuáa'ixaa.

A'íimaj i maj Israel jitze ajtyáma'can, ajta i nyúucarij Moisés ti jaatyájtóo

¹⁷ Pajta muáaj mu paj a'íjci jitze ajtyáma'can i Israel, pajta já'astijre' a'íjci i nyúucarij i maj jin tyí'ijta, pajta á'tzaahuatye' i Dios jimi.

¹⁸ Páamua'reej je'ej ti a'íin tyá'xie've', pajta jamua'tyej a'íjci i nyúucarij i ti tyí'muamua'tyej pej pij tyámua' eenye'.

¹⁹ A'yaa paj tyí'mua'tzej paj jaayí'tin paj tyihuó'mua'tyej a'íjma i maj quee a'náj tyi'huóomua'aj, pajta tyámua' tyihuo'tyéjeevej a'íjma i maj tíca'riste' séejre',

²⁰ pajta a'yan tyí'mua'tzej paj jaayí'tin paj tyihuó'mua'tyej a'íjma i tiquee huá'miteeraste' je'ej ti tyi'tyéevijtij, nusu i maj quee óotzaahuatye', ji'nye a'íj paj jitze tyía'mua'tyej i nyúucarij i maj jin tyí'ijta, i ti ji'réc'can jime'.

21 Típua'aj a'yan petyihuá'mua'tyej i séecan, ¿ji'nye een jime' pequee a'yan tyi' amua'tyej asíj? Típua'aj a'yan petyihuá'mua'tyej maj quee tyí'nahua'aj, ¿ji'nye pej pij muáaj tyí'nahua'?

22 A'yaa paj pajta tyihuá'ixaatye' tijin maj quee juxana'ciria'aj, ¿ji'nye pej pij muáaj tyí'xana'cire'? Típua'aj quee mua'ráanajchij maj hua'najchej i sánturij, ¿ji'nye pej pij tyí'nahua' hua' tyeyúuj tzajta'?

23 A'íj paj jitze á'atzaahuatye' i nyúucarij i maj jin tyí'ijta, pajta períj jaatyáxaahuataca' i Dios, ji'nye capáj a'yan ricij je'ej ti a'íin tyí'ijta.

24 A'íj pu jin a'yan tyé'yu'si' i yu'xarij jitze tijin: “A'íimaj i maj quee tyá'tzaahuatye' mu je'ej pua'aj yó'sej i Dios, ji'nye mua'aj xu quee xá'puí' ricij.”

25 A'yaa pu tyi'ja'yájna tijin a'íjna i ti já'astijre' a'íjci i nyúucarij i maj jin tyí'ijta, tyi'táj pu jin je'ej tyeetyáhuüre'ej, ajta típua'aj quee a'yan rijcaj je'ej ti tyí'ijta i nyúucarij, a'yaa mu ja'uurej mati'ij huó'ruuj a'íjma i maj séej chuéj japua já'ma'can.

26 Ajta típua'aj a'íjna i ti séej chuéj japua já'ma'can já'astijria'aj i nyúucarij i maj jin tyí'ijta, a'yaa mu jaatámua'sij tijin Israel pu jitze ajtyáma'can, tyij ajta quee a'yan tyi'ja'yájnatan.

27 A'íjna i ti a'yan ricij je'ej ti tyí'ijta i nyúucarij, tyij ajta quee ja'antysisíjchaca' i junavíj, a'íi pu ja'xijtye'en a'íjci i ti ja'ancuriáa' i nyúucarij ajta ja'antysisíjchaca' i junavíj.

28 Ji'nye a'íjna i ti Israel jitze ajtyáma'can, capu a'íi na'aj juxie've' i ti jéjre'citze' séejre', ajta

tipua'aj ja'antysisíjchaca' i junavíj, capu ajta a'íi na'aj juxie've' tí'ij a'yan eenye' i jutyévíj jítze.

29 A'íjna i tí tzáahuatyí'ra'aj jin Israel jítze ajtyáma'can, a'yaa pu ajta een i jutzájta', ajta a'íjna i tí ja'antysisíjchaca' i junavíj, a'yaa pu huatóomua'aj tí tyámua' een i juxiéjnyu'caa tzajta', capu a'íi na'aj i tí tyé'yu'si' i yu'xarij jítze, sulu a'íi pu jéetze' juxie've' i júuricama'ra' i Dios. A'tíj tí a'íjna jin néijmi'i a'yan ricij, a'íi pu tyámua' een, ajta quee i tyeítýee jimi je'ráma'can, sulu i Dios pu jimi je'ráma'can.

3

1 A'yaa pu'ij, ¿nyiquij tyi'tíj jin je'ej tye'tyáhuí'rii a'íjci i a'tíj tí Israel jítze ajtyáma'cantaj nusu i tí ja'antysisíjchaca' i junavíj?

2 A'yaa pu tyi'ja'yájna tí jéehua tya'ancuriáa'sij, ajta jéehua jatyáhuí'rii, jí'nye Dios pu anaquéej jaatyájtoo i junyúucaa a'íjma jimi i maj Israel jítze ajtyáma'can.

3 ¿Ji'nye na'quij tye'mej? ¿Nyiquij i Dios ajta je'ej pua'aj rinyij a'íjna jime' i maj meríj i tyétyacaa je'ej pua'aj huaríj?

4 Capu xaa nyu'uj. Dios pu tzáahuatyí'ra'aj jin séejre' ajta jí're'can jime' tí'ij na'aj jusén jime', tyij majta i tyétyacaa jéehua tyí'hue'tacaa, miche' a'yan eenye', jí'nye a'yaa pu tyé'yu'si' i yu'xarij jítze tíjin:

A'yaa mu tyá'mua'reeren paj tyámua' tyi'tyía'cha'ij a'íjna jime' je'ej paj tyí'xaj, pajta tyu'tyámue'tíj matí'ij muá'xijtye'ej.

⁵ Ajta tɪpua'aj a'íjna jime' i tyaj je'ej pua'aj ricij jin séjre'ej ti i Dios jí'reenye'ej séejre', ¿ji'nye tyetyu'taxájtaj? ¿Nyiquij a'yan tyetyu'taxájtaj ti i Dios quee xá'pui' ricij ti'ijta puéjtzij taatá'an? (A'yaa mu tyí'xaj a'íimaj i maj quee jamua'tyej i Dios.)

⁶ ¡Catu xaa nyu'uj! Ji'nye tɪpua'aj i Dios quee tyi'táj tyámua' uuriaj ityájma jimi, ¿ji'nye tyí'rij ti'ij huo'xíjtye'en néijmi'caa i maj yan huacháatimee i cháanacaj japua?

⁷ Ajta tɪpua'aj a'íjna i nyaj jin tyí'hue'taj a'yan tyí'huiire'ej ti'ij i Dios jéetze' tyámua' huataséjre'en, ¿ji'nye een jime' i Dios a'yan tyiná'xíjtye' a'íjci jime' i nyaj jin ootyá'itzee jimi?

⁸ Ajta tɪpua'aj a'yan tyí'eenye', ¿nyij a'yan tyúuxie've' tyaj je'ej pua'aj huárinyij ta'aj ij a'íin huataséjre'en i ti naa een? A'yaa mu séecan nye jitze tyí'pua'ritye' mej mij tyina'antyí'uunyi' je'ej nyaj tyihuá'mua'tyej, ajta a'íjima a'yaa pu tyihuá'ci'tyij mej mij jajpuéetzij muá'ra'nyij.

Néijmi'i tu á'itzeere' i Dios jimi

⁹ ¿Ji'nye na'quij? ¿Nyiquij jéetze' tatyáhuí'rii ityájma i tyaj Israel jitze ajtyáma'can? Capu xaa nyu'uj, ji'nye tu'ríj a'yan tyaataxájtaca' tíjin a'íimaj i maj Israel jitze ajtyáma'can, majta i maj séej chuéj japua já'ma'can, néijmi'i mu meríj je'ej pua'aj huaríj,

¹⁰ ji'nye a'yaa pu tyé'yu'si' i yu'xarij jitze tíjin: Capu síj a'táj séejre' ti tyámua' tyi'tyúucha'íj.

¹¹ Capu a'táj séejre' ti tyojó'itej, capu ma' a'táj ti jahuoocaj i Dios.

¹² Néijmi'i mu meríj je'ej pua'aj huaríj,

majta néijmi'i meríj huóoxana'cirej.

Capu ma' a'tíj ti tyámua' tyi'tyúucha'íj.

Capu na'aj síj a'tíj ma' já'sejre'.

13 Je'ej pu pua'aj namuajre' je'ej maj tyí'xaj,
ajta i hua' nyanúu pu jéehua tyí'hue'tacaa,
hua' tyenyij jitze pu aviitzi' i huá've'rij cú'cu'uj
ti jitze éejnyinyii

14 ajta i maj jin je'ej pua'aj tyihuo'xáj i juxa'aj
tyeítyee, mej mij tyúujaaxiejvi'.

15 Ca'nácan mu jo'huáachajci'ij mej mij séej
huajé'caj,

16 jéehua pu je'ej pua'aj tyí'een jo'maj joojú',

17 camu jamua'reej je'ej maj juxáahuaaj
tyí'tyesejre'ej.

18 Capu je'ej huá'miteeraste' mej mij
jaatyátzaahuatye'en i Dios, nusu maj
jáatziinye'en.

19 A'yaa tu tyá'mua'reej tijin néijmi'i je'ej ti
tyá'xaj i yu'xarij jitze, a'yaa pu tyihua'ixaatye'
a'íjma i maj a'íjna jin tyí'ijta, mej mij néijmi'i
tyu'tyátzaahuatye'en, majta néijmi'i i maj a'yan
huacháatimee i cháanacaj japua jáamua'reej
maj quee xá'pui' huaríj i Dios jimi,

20 ji'nye capu i'ríj ti a'tíj a'yan tyu'taxáj
yee néijmi'i pu ará'astej i nyúucarij, ti'ij ajta
a'yan tyúuxie've'ej ti'ij Dios a'yan jaatámua'tyij
yee tyámua' pu tyi'tyúucha'íj, ji'nye a'íjna i
nyúucarij i maj jin tyí'ijta a'yaa pu tyí'huiire' tyej
tyij a'íjna jin jáamua'reej i tyaj jin quee xá'pui'
huaríj.

*Je'ej ti tyú'rij tyaj ji're'nye'ej huatyá'itzeere'en
i Dios jimi*

21 Ajta ijíj, Dios pu arí a'yan tyitaataséjra je'ej ti tyí'rij tyej tyij jì'rén'ye'ej jimi huatyá'itzeere'en, ajta a'yan cha'tána'aj tyí'ta'ixaatye' a'íjna i nyúucarij, majta a'ímaj i maj ará'tyeej tyí'xajtaca'aj i Dios jitze ma'can,

22 a'íjna i siaj jin tyá'tzaahuatye' i Ciríistu' jimi, a'íj pu jin i Dios tyámua' tyajamuaatyátoosij. Ji'nye néijmi'i mu juxa'aj mana'aj een i Dios jimi,

23 néijmi'i mu meríj ootyá'itzee, a'íj mu jin a'ímuáj já'sejre' i Dios jimi.

24 Ajta i Dios pu juxié'vi'ra' jin a'yan tyihuo'xá'pui'intari'ri' mej mij jì'rén'ya'aj huatyá'itzeere'en, a'íj pu jin hua' japua huatanyúj a'íjci jime' je'ej ti huaríj i Ciríistu' ti ajta Jesús pué'een.

25 Dios pu a'yan jáaruuj tí'ij i Ciríistu' je'ráxire'en i juxúure', ajta je'en a'íjna jin tyihuo'tú'uunyi' i maj jin ootyá'itzee. Ajta tí'ij tyihuo'tú'uunyi' a'yaa pu tyúuxie've' maj tyá'antzaahuatye'en. Dios pu a'yan tyaataséjrataca' je'ej ti a'ín tyámua' ta'uurej, tyitaata'úunyi'ran a'íjna i tyaj jin aamí' ootyá'itzee,

26 ji'nye a'íj pu tajíme' tyí'ijchó've'ej. A'yaa pu huaríj mej mij a'ímaj i tyeítyee ijíj maj séejre' jaaséj i ti a'ín tyámua' táaruuj, ji'nye a'íj pu jì'rén'ya'aj séejre', a'yaa pu'ij ajta tyámua' huá'uurej a'íjma i maj tyá'tzaahuatye' i Jesús jimi.

27 ¿Jo'nyij je'ej je'en a'íjna i ti jin i tyévij óotzaahuatye' i Dios jimi? Capu che' ma' já'sejre', ¿ji'nye een jime'? Capu a'íjna jime' maj

ja'rá'astijrej i nyúucarij i maj jin tyí'ijta, sulu a'íjna jime' i maj tyá'antzaahuaj i Ciriistu' jimi.

28 A'yaa tutyij tyá'mua'reej tijin: Dios pu tyámua' ja'uurej i tyéviij, capu ij tyi'táj je'ej tye'tyáhu'ríi ti néijmi'i ará'astijre'en a'íjci i nyúucarij i maj jin tyí'ijta.

29 ¿Nyiquij i Dios a'íjma na'aj hua' Dios i maj Israel jitze ajtyáma'can? ¿Nyiquee hua' Dios pué'een a'íjma i maj séej chuéj japua já'ma'can? Jee xaa nyu'uj, a'íi pu ajta hua' Dios pué'een néijmi'caa i maj séej chuéj japua já'ma'can,

30 ji'nye síij pu'uj séejre' i Dios, a'íi pu a'íin pué'een i ti tyámua' huá'uurej a'íjma i maj tyá'tzaahuatye', ajta quee jitzán juxie've' tipua'aj Israel jitze mua'ajtyáma'cantaj nusu mequee.

31 ¿Nyiquij a'íjna jin tyá'uunan a'íjci i nyúucarij i maj jin tyí'ijta a'íjci jime' tyej tyá'tzaahuatye'? Catu xaa nyu'uj. Sulu a'íj tu jin a'yan tyá'nejmi'tare'en.

4

Je'ej ti huaríj a'íjna i Abraham

1 ¿Ji'nye tyana'aj tyij tyaataxájta je'ej ti tyi'táj tyu'mué'táj i Dios jimi a'íjna i Abraham?

2 A'yaa xaa nyu'uj tyi'ja'yájna, tipua'aj a'yan metyáamua'tyijche' i Abraham yee tyámua' pu tyi'tyevij a'íjci jime' je'ej ti tyi'táj huáruuj, aj pu xaa i'ríitacaj ti jusíij ahuóotzaahuatye'nyijche', ajta capu je'ej tyíi'rij ti a'yan huárinij i Dios jimi.

3 Ji'nye a'yaa pu tyé'yu'si' i yu'xarij jitze tijin: “Abraham pu ja'antzaahuaj i Dios, a'íj pu jin i

Dios a'yan tyaamua'aj ajta a'yan tyaataxájtaca' tijin tyámua' pu tyí'tyevij."

4 Ajta a'yájna tǐpua'aj a'tǐj tyi'tǐj jin tyí'muarie'ej, camu tyi'tǐj jaatapuéjve'sij juxié'vi'ra' jime', sulu metyá'najchitye'en a'ǐjci jime' i ti a'ǐin tyu'muáriej.

5 Ajta tǐpua'aj a'tǐj tyá'tzaahuatye'ej ti i Dios jaayi'tin ti tyámua' jáa'uurej i tyéviij ti jéehua jimi á'itzeere', Dios pu ajta a'yan tyaataxájta ti tyámua' tyí'tyevij a'ǐjna i a'tǐj, tyij ajta quee tyi'tǐj xá'pui' huáruuj.

6 David pu a'yan cha'tána'aj tyu'taxájtaca' a'ǐjci jime' i a'tǐj ti Dios a'yan tyá'xaj yee ti tyámua' tyí'tyevij, quee a'yan tyaataxáatan tyi'tǐj ti je'ej huáruuj.

7 A'yaa pu tyu'taxájtaca' i David tijin: Miche' huatóotyamua've'en a'ǐimaj i Dios ti tyihuo'tú'uunyi'ri' i maj jin quee xá'pui' huarǐj a'ǐjci jimi.

8 Che' huatóotyamua've'en a'ǐjna i tyéviij ti Dios quee jitzán tyí'pua'ritye' i ti jin ootyá'itzee a'ǐjci jimi.

9 ¿Nyiquij a'ǐjma na'aj ci'puaj i maj merǐj ja'antysisǐchaca' i junavǐj, a'ǐjna i ti jin Dios tyámua' tyihua'tá'caa, ca' ajta hua'ci'puaj i séecan i maj quee a'yan tye'entysisǐchaca' i junavǐj? A'yaa tu tyerǐj tyaataxájtaca' a'ǐjci i Abraham, ti Dios a'yan jaatamua'aj tijin tyámua' pu tyí'tyevij a'ǐjci jime' ti a'ǐin tyá'antzaahuaj.

10 Ajta, ¿a'najnyí a'yan tyaataxájtaca' i Dios? ¿Nyiquij ti'ij i Abraham ja'antysisǐchaca' i junavǐj ca' ti'ij quee xu ja'antysisíchava'caj? Capu

ti'ij ja'antysisjchaca' i junavij, sulu jajcuaj imuaj pu a'yan tyaataxajtaca'.

11 Aj pu'ij Abraham ja'antysisjchaca' i junavij, mej mij jaamua'reej tijin Dios pu arí a'yan tyaataxajtaca' ti tyámua' tyí'tyevij, a'ijci jime' ti tyá'tzaahuatye'. A'ij pu jin i Abraham a'jin pué'een i hua' táataj néijmi'caa i maj tyá'tzaahuatye', tyij majta quee xu ja'antysisjchaca' i junavij, Dios pu a'yan cha'taj na'aj tyihuo'taxajtaj tijin tyámua' mu tyí'tyetyeityee.

12 Ajta i Abraham, a'ii pu ajta hua' táataj pué'een i maj ja'antysisi'chej i junavij, ajta a'ijma i maj tyámua' tyityetyúucha'ij ti'ij ajta a'ijna i Abraham, ti ajta tyá'tzaahuatya'ca'aj ti'ij quee xu ja'antysisi'chava'caj i junavij.

I ti jin Dios tya'tóoratziiri' a'ijma jimi i maj Abraham jitze eeráma'can

13 A'yaa pu i Dios tya'táratziiri' a'ijci i Abraham, ajta a'ijma i maj jitzán eeráanyesij ti a'yan tyihua'ci'tyij néijmi'i i cháanacaj, capu a'yan tya'tácatyij a'ijma jimi i maj ja'rá'astej a'ijci i nyúucarij i maj jin tyí'ijta, sulu a'ijma jimi i maj tyámua' tyityetyúucha'ij majta tyá'tzaahuatye'.

14 Tipua'aj a'ijmaj a'yan tyi'tij metya'ancuria'an i maj já'astijre' a'ijci i nyúucarij i maj jin tyí'ijta, capu ij che' tyi'tij je'ej tyí'huiire' i maj jin tyá'tzaahuatye', capu ajta che' tyi'tij huiire' i ti jin Dios tya'tóoratziiri'.

15 Ji'nye puéjtzij pu hua'tá'caa a'ijna i nyúucarij i maj jin tyí'ijta, ajta jo'tij quee já'sejre'

i nyúucarij maj jin tyí'ijta, camu majta tyi'táj jin já'itzeere' a'íjci jimi i nyúucarij.

16 A'íj pu jin, ta'aj ij a'íjna i ti jin i Dios tya'táratziiri' i Abraham a'íjma jimi huatyá'itzeere'en i maj jitzán eeráma'can, a'yaa pu huáapua'aj hua' jimi tyí'sejre' a'íjna jime' i maj tyá'tzaahuatye'. A'yaa pu'ij huatóomua'aj tiquee a'íjma na'aj jimi tya'tóoratziiri' i maj ja'astej i nyúucarij i maj jin tyí'ijta, sulu a'íjma pu ajta jimi i maj a'yan cha'taj mana'aj tyá'tzaahuatye' tí'ij i Abraham. A'íj pu jin a'ín pu'é'een i tatáataj néijmi'caa ityájma,

17 a'yaa pu tyé'yu'si' i yu'xarij jitze tijin: “A'yaa nu tyimua'antyáarujtye pej pij hua' táataj pu'é'eenye' mui'caa i tyeítyee.” A'íi pu a'ín pu'é'een i Dios, i Abraham ti jimi tyá'antzaahuaj, a'íi pu a'ín pu'é'een i Dios ti jaayí'tin ti huo'tájuuritye'en a'íjma i maj meríj huácuij, ajta tyí'taahuaj tyi'táj tiquee xu tyí'sejre'.

18 Ajta a'íjna i Abraham, a'yaa pu tyá'antzaahuaj maj mue'táj jitzán eerányesij i tyeítyee je'ej ti Dios tya'táratziiri', a'íj pu jin a'ín pue'éenye'ej ta'raj i hua' táataj mui'caa i tyeítyee, a'yájna tí'ij i Dios tyaaté'exaa tijin: “Mue'táj mu i tyeítyee a' jitze eerányesij.”

19 Ajta i ti jin tyá'tzaahuatya'ca'aj a'íjna i Abraham capu huatyápua'riaca', majta arí tin anxityej nyinyi'ra'aj jájcha'íica'aj, ajta a'íjna i Sara ti íira'ra'an pu'é'eenye'ej a'íi pu ajta arí ucarístaca'aj, a'íj pu jin a'yan tyí'mua'ajcaa ti quee che' je'ej tyí'riitaca'aj mej mij tyiyóoj muá'ra'nyij.

²⁰ Capu jaatáxaahuataca' capu ajta quee che' jitzán tyi'ca'nyajca'aj je'ej ti i Dios tya'táratziiri', sulu jéetze' pu tyá'antzaahuaj. Ajta tyaatatyójtzi'rej i Dios,

²¹ a'yan tyá'tzaahuatye'ej ti i Dios a'yan rinyij je'ej ti arí tya'táratziiri'.

²² A'ij pu jin i Dios a'yan jaatamua'aj a'ijci i Abraham ti tyámua' tyi'tyúucha'iica'aj a'ijci jimi.

²³ Ajta a'ijci jime' ti i Dios a'yan jaatamua'aj, capu a'yan tyé'yu'si'huaca'aj ti'ij a'yaa na'aj tyáaci'tyij a'ijci i Abraham,

²⁴ sulu a'yaa pu ajta tyo'tyéyu'si'huaca' ityájma jimi. Ji'nye Dios pu a'yan cha'taj na'aj tyí'tamua'tyej a'ijci jime' i tyaj jin tyá'tzaahuatye', tipua'aj tyetyá'antzaahuatye'en a'ijci jimi i ti jaatájuurityej a'ijci i Jesús ti tavástara' pué'een,

²⁵ i ti huátátuiihuaca' ti'ij tajitzé ma'can huámu'i'nyij, a'ijci jime' tyaj quee xá'pui' huaríj i Dios jimi, ajta je'en Dios jaatájuurityej ti'ij ityájma tyámua' tyitaatyátoonyij.

5

I tyaj jin jáamua'reej ti i Dios jéehua taxie've'

¹ Dios pu arí tyámua' tyitaatyájtoo, a'ijci jime' i tyej tyá'tzaahuatye', pu'ríj tyaj taxáahuaj séjre'ej i Dios jimi, tyajta tyaatatyójtzi're'en a'ijci i tavástara' Jesús i ti ajta Ciríistu' pué'een.

² Ji'nye a'ii pu i Ciríistu' taatá'i'rúityej tyej tyij ajtyáxiirej i Dios jimi, a'ijci jime' i tyej tyá'tzaahuatye', tyej tyij huátatyamua've'en a'ijna jime' i ti tyámua' tyitaatyájtoo, tyámua'

tutyij een, tyajta tatyamua've' a'íjci jime' tyaj jajchó've' a'ájna xicáara' i tyaj jamuán séeria'aj tá'ra'nyij i Dios.

³ Ajta quee a'íi na'aj, sulu a'íj tu tyajta jin tatyamua've' i tyaj jajpuéjtzij, ji'nye a'yaa tu tyá'mua'reej tijin a'íi pu ca'nyíjra'aj tatá'caa tyej tyij tyo'táviicue',

⁴ ajta i tyej tyámua' eenye' pu tatá'caa tyej tyij jéetze' tyámua' huárinyij, ajta i tyaj jéetze' tyámua' eenye' pu tatá'caa tyej tyij tyi'ijchó've'e'j tyaj a'áa jo'tyá'itzeere'en i Dios jimi.

⁵ Ajta i tyaj jin tyi'ijchó've' capu a'náj taatatyévi'raste'sij, ji'nye Dios pu ca'nyíjra'aj taatá' i tatzájta', a'íjci jime' ti ju júuricamej ityájma jimi huatyájto.

⁶ Ji'nye tyati'ij ityáj quee pújooriajva'aj tyaj tajapúa huatányuunyij, Círíistu' pu tajitzé ma'can huamuí' néijmi'caa ityájma i tyaj quee xá'puí' huaríj.

⁷ Jéehua pu tyési' ti a'tíj séej jitze ma'can huámui'nyij. Capu ajta a'tíj óoca'nyej ti séej jitze ma'can huámui'nyij i tyévi'j ti tyámua' tyi'tyevij, nusu xaa a'tíj óoca'nyej ti jitzán ma'can huámui'nyij i a'tíj ti jéehua huápuí'ij tyi'tíj xá'puí' huáruuj jimi.

⁸ Ajta i Dios pu a'yan tyitaataséjratyej ti huápuí'ij taxie've', ji'nye tyati'ij tyooj jéehua a'itzéeria'caj a'íjci jimi, Círíistu' pu tajitzé ma'can huamuí'.

⁹ Ajta ijíj, tí'ij i Dios tyámua' tyitaatyájtoo a'íjci jime' ti Círíistu' tajitzé ma'can huamuí', tyámua' pu'ij jéetze' tyi'tahuiire' tí'ij quee i

puéjtzij táaci'tyij.

¹⁰ A'yaa pu tyi'ja'yájna, ji'nye tyati'ij tyooj ja-jcha'íria'caj i Dios, a'íi pu tyámua' tyitaatyájtoo a'íjci jime' ti i yójra' tajitzé ma'can huamuí', jéetze' pu'ij tajapuá huatányuusij, tyej tyij tyámua' tyityeetyá'itzeere'en, ijíij tyaj tyeríj jimí ajtyu'uj.

¹¹ Ajta quee a'íi na'aj, sulu tyajta tu huatátatyamua've'sij i Dios jimi, a'íjci jime' ti i tavástara' Jesús i ti ajta Ciríistu' pué'een tyámua' táaruuj, tyej tyij tyámua' tyityeetyá'itzeere'en i Dios jimi.

A'íjna i Adán ajta a'íjna i Ciríistu'

¹² A'yaa pu tyi'ja'yájna, síj pu'uj i tyéviij ti je'eij pua'aj huaríj a'yan huataséjre i cháanacaj japua aj mu mij néijmi'i je'eij pua'aj huaríj, aj pu'ij a'yan atyojo're'nyej ti huamuí' a'íjna i a'tíj, a'íj mu mij jin majta néijmi'i huácuuj i maj a'íjci jitze i tyéviij eeráanyej, ji'nye néijmi'i mu majta ootyá'itzee i Dios jimi.

¹³ Ti'ij quee xu huatyátuiihuaca' i nyúucarij i maj jin tyí'ijta, mu'ríj a'yan tyityá'itzeeria'ca'aj i tyeítyee i Dios jimi, ajta tipua'aj quee séjre'eij i nyúucarij i maj jin tyí'ijta, capu i'riitaca'aj ti séej a'yan tyo'xíjtye'en je'eij ti tyi'tíj jin tyo'tyá'itzee.

¹⁴ Ajta ti'ij na'aj tyu'séjrej i Adán 'asta na'aj quee huataséjre a'íjna i Moisés, néijmi'i mu i tyeítyee huácuuj i maj quee xá'puí' huaríj, tyij majta quee a'yan cha'taj mana'aj huaríj ti'ij a'íjna i Adán i ti'iquee ja'rá'astijrej je'eij ti i Dios tyaata'íj, ji'nye Adán pu a'yan éenye'eij ti'ij i ti ya'uvé'nyesij.

15 Ajta i ti jin ootyá'itzee a'íjna i Adán, capu a'yan cha'tána'aj een ti'ij i ti Dios juxié'vi'ra' jin taatapuéjve. Ji'nye mue'táj mu huáacuii a'íjci jime' ti sáij ootyá'itzee i Dios jimi, ajta a'íjna i Dios ti taatapuéjve, a'íjci jime' je'ej ti i sáij i tyéviij huaráj juxié'vi'ra' jime', a'íi pu a'íin pué'een i Ciríistu', jéetze' pu'ij tyí'huiire' ajta ti'ij tyámua' tyihuo'tyátoonyij mui'caa i tyeítyee.

16 A'íjna i ti jin sáij ootyá'itzee i Dios jimi, capu a'yan cha'taj na'aj een ti'ij i ti Dios taatapuéjve, ji'nye ti'ij sáij i a'táj ootyá'itzee i Dios jimi, aj pu'ij huataséjre i puéjtzij, ajta i Dios ti taatapuéjve, a'íjci jime' i maj jéehua ootyá'itzee a'íjci jimi, a'íi pu tata'caa tyej tyij ji'r'é'nye'ej huatyá'itzeere'en a'íjci jimi.

17 Ji'nye a'íj mu jin huácuij i tyeítyee a'íjci jime' ti sáij na'aj i tyéviij quee xá'pui' huaráj, jéetze' pu'ij i Dios tyámua' ta'uurej a'íjci jime' i ti taatapuéjve, tyej tyij ji'r'é'nye'ej huatyá'itzeere'en a'íjci jimi, a'íjci jime' je'ej ti huaráj a'íjna i tyéviij, a'íjna i Jesús ti ajta Ciríistu' pué'een.

18 Ajta a'íjna i ti jin quee tyámua' huaráj i Adán, Dios pu'ij néijmi'caa ooxíjtye i tyeítyee ti'ij puéjtzij huo'tá'an, a'yaa pu'ij ajta tye'rájraa mej mij néijmi'i ji'r'é'nye'ej huatyá'itzeere'en, a'íjci jime' je'ej ti huaráj i Ciríistu' mata'aj mij júurij muá'ra'nyij jusén jime'.

19 A'yaa pu sáij na'aj i tyéviij quee tya'rá'astijre je'ej ti i Dios tyaata'íj, a'íj mu jin mue'táj ootyá'itzee i Dios jimi, a'yaa pu'ij ajta mui'caa tyu'cí'ij mej mij ji'r'é'nye'ej huatyá'itzeere'en i Dios jimi a'íjna jime' ti sáij i tyéviij ja'rá'astej

í Dios, mej mij mue'tíj tyámua' huárinyij í tyeítjee.

²⁰ Ajta a'íjna í nyúucarij í maj jin tyí'ijta, a'yaa pu een jin huatyátuihuaca' tí'ij jéetze' huataséjre'en í maj jin ootyá'ítzee í Dios jimi, ajta tí'ij jéetze' huataséjre í maj jin ootyá'ítzee, Dios pu ajta jéetze' tyámua' tyihuo'tá' juxié'vi'ra' jime'.

²¹ A'íjna í tí je'ej pua'aj een í Dios jimi, a'yaa pu tyihuo'mué'tíj mej mij huácui'nyij, a'yaa pu cha'tána'aj tyu'tyámue'tíj í tí jin Dios tyámua' tyitaatá', tyej tyij jí'ré'nye'ej huatyá'ítzeere'en, ajta tyej tyij júurij tá'ra'nyij jusén jime' a'íjci jimi í tavástara' Jesús tí ajta Círíistu' pué'een.

6

Ityáj tu júurij séejre' í Círíistu' jimi

¹ ¿Ji'nye tyana'aj tyij tyu'taxájtaj? ¿Nyiquij tyooj atya'ítzé'rihua'aj tá'ju'un ta'aj ij í Dios jéetze' tyámua' tyihuojó'mua'raj?

² Catu xaa nyu'uj. Tu'ríj ityáj huácuij a'íjci jimi í tí je'ej pua'aj een, ¿ji'nye ooj tyí'riij tyaj a'yan tyí'tyechaj ta'tya'ítzé'rihua'aj tyi'tíj jime' tíquee xá'pui' een í Dios jimi?

³ ¿Nyij sequée jamua'reej, siaj jimi ajtyáhuixij í Círíistu' siatí'ij huái'huaca', tyajta je'en jitzán ajtyáma'cantaj ta'raa tí'ij a'ín huamuí'?

⁴ Ji'nye tyatí'ij huái'huaca' tyajta tu avá'nami'huaca' í Círíistu' jamuán, tyajta huá'cui'ihuaca' tyej tyij huatájuurej tyajta je'en jájcuan jin chajca, a'yájna tí'ij í Círíistu'

tyu'tájuuriaca' a'íjci jime' i Dios ti néijmi'i jin putyí'uurej.

⁵ Tipua'aj a'íjci jitze ta'ajtyáma'cantaj i Ciríistu' ti'ij a'íin huamuí', tyajta tu jitzán ajtyama'cáantaj ta'raj ti'ij a'íin huatájuuriaca'.

⁶ A'yaa tu tyá'mua'reej tijin je'ej tyaj jájcuaj tyi'tyítacha'íica'aj a'íi pu ajta jamuán óotateehuaca' i Ciríistu', ti'ij antyipua'rej a'íjna ti je'ej pua'aj een i tyaj jin tyítacha'íica'aj, ti'ij quee che' ca'nyíjra'aj tatá'care'en a'íjna i ti je'ej pua'aj een.

⁷ Ji'nye tipua'aj a'tíj arí huámui'nyij, capu che' i'ríitaj ja'mej ti i ti je'ej pua'aj een tyaata'íjtye'en.

⁸ Tipua'aj tyeríj jamuán huácuij i Ciríistu', jitzán tutyij tyí'ca'nyej tyej tyajta jamuán júurij tá'ju'un.

⁹ A'yaa tu tyá'mua'reej tijin ti'ij i Ciríistu' huatájuuriaca', capu che' i'ríj ti'ij ajtáhua'aj huámui'nyij. Capu che' i'ríj ti ja'antymué'tin a'íjna i ti a'íjna jin tyí'ijta mej mij huácui'nyij.

¹⁰ Ji'nye i Ciríistu', ti'ij huamuí', a'yaa pu een jin huamuí' ti'ij jo'puá'ritye'en a'íjci i ti je'ej pua'aj een i maj jin tyúucha'íica'aj, ajta ti'ij huatájuuriaca', a'íi pu jin júurij ta'raa ti'ij i Dios jimi séjre'ej.

¹¹ A'yaa xu sij cha'taj siana'aj mua'aj tyá'mua'reeríaj siaj seríj huácuij a'íjci jimi i ti je'ej pua'aj een, maj siajta júurij i Dios jimi a'íjci jime' siaj seríj jitzán ajtyáma'can i Ciríistu' ti ajta Jesús pué'een.

¹² A'íj pu jin, caxu tyi'tá'care'en ti i ti je'ej pua'aj een tyajá'mua'íjtye'ej i ja'mua tzajta', caxu

siajta já'astijria'aj a'íjci i ti je'ej pua'aj een i ti ja'mua tzajta' eerányinyii.

13 Caxu siajta jatuiiria'aj i ja'muatyévira' a'íjci i ti je'ej pua'aj een, siaj sij a'íjci jimi tyí'huüre'ej. Sulu siata'aj huatóotonyij i Dios jimi, matí'ij tyeítýee maj meríj huácuuj majta je'en huatájuuriaca' a'íjci jime' ti a'ín arí jamuáahuii, siata'aj jaatátuiire'en i jutýévira' siaj sij jaatyáhuüre'en tyi'tíj jime' ti xá'puí' een.

14 A'yaa pu quee che' a'náj tyajamaata'íjtye'sij a'íjna i ti je'ej pua'aj een, jí'nye caxu ca'nyéjrij jin já'astijre' a'íjci i nyúucarij i maj jin tyí'ijta, sulu a'íj xu jitze aróoca'nyej i ti i Dios juxié'vi'ra' jin tyámua' jamuáaruuj.

Típua'aj ca'nyéjrij jin metý'huüiria'aj

15 ¿Ji'nye tyajamuá'miteeraste' mua'ajmaj? ¿Nyiquij tyooj je'ej pua'aj tyi'tytacha'íj tá'ju'un a'íjci jime' ti Dios juxié'vi'ra' jin tyámua' tyitatá'caa, tyajta quee che' já'astijria'aj a'íjci i nyúucarij i maj jin tyí'ijta? Catu xaa nyu'uj.

16 Mua'aj xu tyámua' tyá'mua'reej tíjin típua'aj xatóotoonyij a'tíj jimi siaj sij ca'nyéjrij jin ja'rá'astijre'en, mua'aj xu ca'nyéjrij jin jaatyáhuüre'ej. Típua'aj a'yan setyá'astijria'aj a'íjci ti je'ej pua'aj een, a'í pu jamuata'á'sij siaj sij huácu'nyij, na'ríj típua'aj a'yan setyeetyáhuüre'en a'íjci i ti xá'puí' een, mua'aj xu júurij huatyá'itzeere'ej i Dios jimi.

17 Ajta tyiche' tyaatatyójtzi're'en i Dios ja'mua jime', jí'nye mua'aj mu xu anaquéej ca'nyéjrij jin jahuüiria'ca'aj a'íjci ti je'ej pua'aj een, xu'ríj

ja'rá'astej a'íjci i nyúucarij i maj jin tyajamuaa-
muá'tyej.

18 Ti'ij Dios jamui'rájtoo siaj sij quee che'
ca'nyéjrij jin jatyáhuirihua'an a'íjci i ti je'ej
pua'aj een, a'yaa pu jamuáaruuj siaj sij
jaatyáhuire'en a'íjci i ti xá'puí' een a'íjci jimi i
Dios.

19 (A'yaa nu tyajámua'ixaatye' je'ej ti tyi-
huámiteeraste' hua' tzajta' i tyeítyee, ji'nye
óóche' pu jamuá'itziitye' siaj sij néijmi'i jo'itéej
xá'ra'nyij.) A'yájna siati'ij ará'tyeej tyityaató'a'
siaj sij jaatyáhuire'en a'íjci i ti je'ej pua'aj
een, siaj sij jéehua huóoxana'cire'en i Dios
jimi, a'yaa pu'ij tyúuxie've' siaj a'yan cha'taj
siana'aj tyityaatóotoonyij néijmi'i jime' siaj sij
jaatyáhuire'en i ti xá'puí' een, siata'aj sij
ji're'nye'ej huatyá'itzeere'en i Dios jimi.

20 Siati'ij siooj jatyáhuirihua'aj a'íjci i ti je'ej
pua'aj een, caxu a'íjci jitze tyí'huirria'ca'aj i ti
xá'puí' een i Dios jimi,

21 ¿tyi'tanyí ij jin je'ej tyajamuaatyáhuíi? Ijij
xu sij jutyevi'ra' a'íjci jime' je'ej siaj tyi'táj
huáruuj, ji'nye i ti je'ej pua'aj een, a'yaa pu
tyu'tá'caa siaj sij a'íjci jin huácu'nyij.

22 Ajta ijíij, ti'ij Dios jamui'rájtoo siaj sij
quee che' jatyáhuirihua'an a'íjci i ti je'ej pua'aj
een, xu'rij sij jahuúire' i Dios. A'íi pu xaa
já'muahúire'en, ji'nye a'ij pu jitze eeráamej i
júuricamej ti naa een, i siaj jin júurij xá'ju'un
jusén jime'.

23 A'yaa pu tyámue'tin i a'táj ti huámui'nyij
tipua'aj jaatyáhuire'en a'íjci ti je'ej pua'aj een,

ajta i ti Dios juxié'vi'ra' jin tyámua' tyitaatá', a'íi pu taatá'sij tyej tyij júurij huatyá'itzeere'en a'íjci jamuán i Ciríistu' ti ajta Jesús pué'een, i tavástara'.

7

Je'ej ti huatóomua'aj tipua'aj i maj tyóovi'tin

¹ Nye'ihuáamua', mua'aj xu jamua'tyej i yu'xarij i maj jin tyí'ijta, a'yaa xu siajta tyá'mua'reej ti i nyúucarij a'yan tyé'ijtye' tí'ij ooj júurij i a'tíj.

² Ajta a'yájna tipua'aj íiti' huicha'aj, a'yaa pu tyé'ijtye' a'íjna i nyúucarij ti a'yan tyúuxie've' ti i íiti' huatyá'itzeere'en i jucín jamuán tí'ij ooj júurij, ajta tipua'aj i cína'ra'an arí huámui'nyij, capu che' a'yan tye'íitye'ej ja'mej i nyúucarij.

³ A'íj pu jin, tipua'aj séej jamuán huatyéviche'en, tí'ij ooj júurij i cína'ra'an, juxana'cire' a'íjna i íiti', ajta tipua'aj i cína'ra'an arí huámui'nyij, a'íjna i nyúucarij capu che' tye'íitye'ej ta'mej, aj pu'ij i'ríitaj ja'mej ti séej tyáataj jamuán huatyéviche'en.

⁴ Siajta mua'aj, nye'ihuáamua', siati'ij jitzán ajtyáhuixij i Ciríistu' aj xu sij siajta jamuán huácuij a'íjci jimi i nyúucarij i maj jin tyí'ijta, a'íj xu jin mua'aj séej jitze ajtyáma'can, a'íi pu a'íin pué'een i ti huamuí' ajta je'ej huatájuuriaca'. A'íj pu jin i'ríj tyej jaatátuiire'en i Dios i tyaj jin xá'pui' huaríj.

⁵ Ji'nye tyati'ij a'yan tyí'tyechajca'aj mati'ij i maj je'ej pua'aj tyityetyúucha'ij, a'íjna i nyúucarij i maj jin tyí'ijta, a'yaa pu tyitaatyáhuui

tyej tyij jáamua'reej tyaj quee xá'puí' rijcaa, a'íj tuyij huamue'tij tyej tyij huácuí'nyij.

⁶ Ajta ijíj tyaj tyeríj huácuíj a'íjci jimi i nyúucarij ti néijmi'i jin tyí'ta'ijtya'ca'aj, tu'ríj taxáahuaj séejre' tyej tyij jaatyáhuire'en i Dios a'íjci jime' i júuricamej ti jájcuaj, catu che' a'íjci jimi i nyúucarij ti mí'ma'can.

A'íjna i ti je'ej pua'aj een ti nye jitze séejre'

⁷ ¿Nyij a'yan tyetyu'taxájtaj ti i nyúucarij i maj jin tyí'ijta je'ej pua'aj een? Catu xaa nyu'uj, ji'nye canu a'yan tya'mua'rériaajche' tyi'tíj ti je'ej pua'aj een tipua'aj quee huatya'itzéere'nyijche' ityájma jimi a'íjna i nyúucarij i maj jin tyí'ijta. Canu a'náj jamua'rériaajche' ti je'ej pua'aj een tipua'aj nyetyí'nyacua'tzaj, tipua'aj quee a'yan tyinaaté'exaatye'nyijche' a'íjna i nyúucarij yee: “Capáj tyí'nyacua'tzaj.”

⁸ Ajta a'íjna i ti je'ej pua'aj een a'íj pu jitze huóoca'an, ti'ij nye jitze jaatyátoonyij néijmi'i i ti je'ej pua'aj een. Ji'nye tipua'aj quee séejre'ej i nyúucarij i maj jin tyí'ijta, capu i'ríj tyaj jáamua'reej tyi'tíj ti je'ej pua'aj een.

⁹ Ajta jájcuaj imuáj, nyaxáahuaj nu jo'chá'canya'aj, canu tyi'tíj mua'reeriaca'aj, ajta nyati'ij jáamua'reeri' a'íjci i nyúucarij i maj jin tyí'ijta, aj pu'ij jéetze' huataséejre nye jimi a'íjna i ti je'ej pua'aj een, aj nu nyij huamuí'.

¹⁰ Ajta a'íjna i nyúucarij ti tyámua' tyinaatá'nyijche' nyej nyij júurij ná'ra'nyij, a'yaa pu tyino'xíjtyej nyej nyij huámui'nyij,

¹¹ ji'nye a'íjna i ti je'ej pua'aj een a'íj pu náacuanamuaj nyej nyij quee ja'rá'astej a'íjci i

nyúucarij, a'íj pu'ij jin i nyúucarij no'xíjtyej nyej nyij huámui'nyij.

12 A'íj pu jin tyámua' een a'íjna i nyúucarij i maj jin tyí'ijta, ajta quee tyi'tíj ja'itziitye', néijmi'i pu xá'pui' een.

13 Ajta ji'nye na'quij, ¿nyiquij a'íjna i ti xá'pui' een no'xíjtyej nyej nyij huámui'nyij? Capu xaa nyu'uj. A'yaa pu tyúuxie'va'ca'aj ti huataséjre'en i ti je'ej pua'aj een, a'íj pu jin a'íjna i ti xá'pui' een no'xíjtyej nyej nyij a'íjci jin huámui'nyij, ti'ij ajta séeria'aj já'ra'nyij ti jéehua huápu'i'ij je'ej pua'aj huasé'rin i Dios jimi a'íjna i ti je'ej pua'aj een.

14 A'yaa tu tyá'mua'reej ti i nyúucarij a'íjna jitze ma'can i júuricama'ra' i Dios, nyajta nyáaj canu uhuájca'nyej, néijmi'i nu jin jahui're' a'íjci i ti je'ej pua'aj een.

15 Canu yó'itej je'ej nyaj een jime' jin a'yan tyi'tyínyecha'íj, ji'nye canu a'yan ricij je'ej nyaj tyá'xie've', ajta a'íjna i ti quee na'ráanajchij, a'yaa nu a'íjci jin ricij.

16 Ajta tipua'aj a'yan nyarijca a'íjci jime' i ti quee na'ráanajchij, aj nu nyij a'yan tyá'mua'reeren ti xá'pui' een a'íjna i nyúucarij i maj jin tyí'ijta.

17 A'íj nu jin quee che' nyáaj a'íin pué'een i ti a'yan ricij, sulu a'íjna i ti je'ej pua'aj een i ti ú'sejre' yunyatzájta'.

18 Ji'nye a'yaa nu tyá'mua'reej yunyatzájta', i nyahue'ra' jitze ti quee uhuájca'nyej, ti quee ú'sejre' i ti xá'pui' een, tyij nyajta a'yan tyá'xie've' nyaj a'yan huárinyij a'íjci jime' i ti xá'pui', canu pújoorej nyaj a'yan huárinyij.

19 Canu a'íjci jin a'yan ricij i ti xá'pui' i ti na'ráanajchij nyej nyij a'yan huárinyij, sulu a'íj nu jin je'ej pua'aj ricij i tiqee na'ráanajchij.

20 Arí ijíj, tipua'aj a'yan nyarijca a'íjci jime' je'ej tiqee tyina'ráanajchi, canu che' nyáaj a'íin pué'een i nyaj a'yan ricij, sulu a'íjna i ti je'ej pua'aj een ti ú'sejre' yunyatzájta'.

21 A'yaa pu'ij tyé'miteere' nyaj jaxie've' nyaj xá'pui' huárinyij, ajta canu pújoorej, ji'nye nye jitze pu séejre' a'íjna i ti je'ej pua'aj een.

22 I nyaxiéjnyu'caa nu jin jaxie've' nyaj ja'rá'astee a'íjci i Dios nyuucáaj,

23 a'íi pu nyo'se' a'íjna i ti je'ej pua'aj een a'íjci jamuán i ti tyí'ijta yu nyaxiéjnyu'caa tzajta'. A'íi pu a'íin pué'een i ti je'ej pua'aj een i ti tyí'ijta nyej jitze ti ajta arí naatyáaji'quej.

24 Canu nyij che' je'ej tyéejtyoovej. ¿A'tanyíj nii'rátosij a'íjna jitze i nyaj jatyáhue'ra' tí'ij quee a'yan tyináaci'tyij nyaj huámui'nyij?

25 A'íi pu'uj i Dios, i nyaj tyé'tyojtzi're', a'íjci jitze ma'can je'ej ti huaríj a'íjna i Jesús, i Círíistu' ti ajta tavástara' pué'een. A'yaa nu nyij tyiyó'itej nyej jaatyáhuire'en je'ej ti tyeetyájtoo a'íjna i Dios i junyúucáa, nyajta quee nyaca'nyej a'íj nu nyij jin putya'huire' a'íjci i ti je'ej pua'aj een.

8

Tyej tyámua' tyi'tyítacha'íj je'ej ti tyá'xie've' i júuricama'ra' i Dios

1 A'yaa pu'uj, capu che' tyi'tíj je'ej huá'uurej a'íjma i maj jitzán ajtyu'uj i Círíistu', ti ajta Jesús pué'een,

2 Ji'nye a'íjna i nyúucaria'ra' i júuricama'ra' i Dios, i ti ajta tyu'tá'caa tyej tyij júurij tá'ra'nyij a'íjci jimi i Ciríistu', a'íi pu mui'rájtoo a'íjci jitze i ti je'ej pua'aj een ti ajta tyu'jé'caj.

3 Ji'nye i Dios pu a'yan huaríj je'ej tiquee tyu'tái'riitariaca' ti a'yan huárinyij ityájma jimi a'íjna i nyúucarij i maj jin tyí'ijta Moisés ti jaatyájtoo, capu táahuii a'íjna i nyúucarij a'íjci jime' tyaj quee ja'viicue'raca'aj tyaj ja'rá'astej. A'íj pu jin Dios muyo'ta'ítyaca' i juyój ti'ij a'íin a'yan cha'tána'aj huataséjre'en mati'ij i tyétyacaa i maj je'ej pua'aj tyityetyúucha'ij i Dios jimi, ti'ij huatóomu'vejritaj a'íjma jitze ma'can i maj ootyá'itzee i Dios jimi, a'yaa pu a'íjna jin huaríj ti'ij jo'xíjtye'en ti'ij quee che' tyi'ta'íitya'aj já'ra'nyij a'íjna i ti je'ej pua'aj een.

4 A'íi pu a'yan huaríj tyej tyij ityáj ja'rá'astijre'en je'ej ti tyúuxie've' a'íjci jitze i nyúucarij, ji'nye catu che' a'yan tyi'tyítacha'ij a'íjci jime' i ti je'ej pua'aj een ti eerányinyii i tatzájta', sulu a'íj tu jitze arátaca'nyej i júuricama'ra' i Dios.

5 A'íimaj i maj a'yan tyityetyúucha'ij a'íjci jime' ti je'ej pua'aj een ti eerányinyii i hua' tzajta', a'yaa mu a'íjci jitze tyí'mua'tzej je'ej ti a'íin ca'nyíjra'aj tyihua'tá'caa, majta a'íimaj i maj a'íjci jitze aróoca'nyej i júuricama'ra' i Dios, a'yaa mu a'íjci jin tyá'huoo je'ej ti tyá'xie've' a'íjna i júuricama'ra' i Dios.

6 Tipua'aj a'tíj a'íjci jitze tyí'mua'ajcaj i ti je'ej pua'aj een ti tzajta' eerányinyii, a'yaa pu tyá'ci'tyij ti'ij huámui'nyij, ajta tipua'aj

a'tíj a'íjci jitze tyí'mua'ajcaa je'ej ti tyá'xie've' a'íjna i júuricama'ra' i Dios, a'íi pu júurij huatyá'itzeere'ej ajta tyámua' tyi'éenye'ej ja'mej a'íjci jimi.

⁷ Majta a'íimaj i maj a'íjci jitze tyí'mua'tzej i ti je'ej pua'aj een, a'íi mu jájcha'íire' i Dios, ji'nye camu jaxie've' majta quee pújoorej maj ja'rá'astej i nyúucaria'ra' i Dios.

⁸ A'íj pu jin a'íimaj i maj a'yan tyá'astijre' a'íjci ti je'ej pua'aj een ti hua' tzajta' eerányinyii, capu je'ej tyí'rij maj tyámua' tyaatá'an i Dios.

⁹ Siajta mua'aj caxu che' a'yan tyí'tyechej tí'ij i ti je'ej pua'aj een, sulu je'ej ti tyúuxie've' i júuricama'ra' jimi i Dios, ji'nye a'íi pu'ríj huatyá'itzeje ja'mua jimi. Dios pu ja'mua tzajta' séejre'. Ajta a'íjna i ti'quee jimi séejre' i júuricama'ra' i Ciriístu', capu Ciriístu' jitze ajtyáma'can.

¹⁰ Ajta tipua'aj i Ciriístu' ja'mua tzajta' séejre'ej, a'íi pu ajta ja'mua tzajta' séejre' i júuricamej, ji'nye Dios pu arí tyámua' jamuáaruuj, tyij ajta arí i ja'muatyévira' huamuí' a'íjci jitze i ti je'ej pua'aj een.

¹¹ Ajta tipua'aj ja'mua tzajta' séejre'ej i júuricama'ra' i Dios ti jaatájuurityej a'íjci i Ciriístu', a'íi pu ajta jaatájuuritye'sij i siaj jatyáhue'ra' a'íjci jime' ti i júuricama'ra' arí ja'mua tzajta' séejre'.

¹² A'íj pu jin nye'ihuáamua' a'yan tyúuxie've' ityájma jimi tyej tyij quee che' a'yan tyá'astijre'ej a'íjci ti je'ej pua'aj een i ti tatzájta' eerányinyii.

13 Ji'nye tipua'aj a'yan setyityetyúucha'íij a'íjci jime' i ti je'ej pua'aj een i ti eerányinyii ja'mua tzajta', a'yaa pu tyajá'muaci'tyij siaj huácui'nyij, ajta tipua'aj sequée che' já'astijria'aj a'íjci i ti je'ej pua'aj een ti eerányinyii i ja'mua tzajta', siajta je'en a'íjci jitze aróoca'nyej i júuricama'ra' i Dios, aj xu júurij xá'ju'un.

14 Néijmi'i i maj jitzán aróoca'nyej i júuricama'ra' i Dios, a'íi mu yójmua'mua' pué'een i Dios.

15 Siajta mua'aj caxu a'íjna ancuriáa' i júuricamej tí'ij ca'nyéjrij jin tyajamuata'íjtye'en siaj sij siajta jatziinya'aj a'íjci i ti tyajá'mua'íjtye', sulu a'íi pu a'íin pué'een i júuricama'ra' i ti a'yan já'mua'uurej siaj sij yójmua'mua' pue'éenye'ej xá'ra'nyij i Dios. A'íj tu júuricama'ra' jitze arataca'nyáaj tyij a'yan tyé'jee tíjin: “Muáaj paj tavástara' pué'een.”

16 Ajta a'íjna i júuricama'ra' i Dios, ajta i tajúuricamej, a'yaa mu cha'taj mana'aj tyá'mua'reej tyaj yójmua'mua' pué'een i Dios.

17 Ajta tyaj tyerij yójmua'mua' pué'een i Dios, tyi'tíj pu a'íjci jin ajta taci'tyij i Dios jimi jamuán i Ciriístu', ji'nye ityáj tu tyajta jamuán jajpuéjtzij i Ciriístu' tyajta tutyij jamuán séeria'aj tá'ju'un jusén jime'.

A'íjna ti huápuí'ij naa huasé'rihua'aj ta'mej ti ooj maja'vé'mej

18 A'yaa pu tyiná'miteeraste' nyéetzij, a'íjna i tyaj jin jajpuéjtzij íiyan i cháanacaj japua, capu tyi'tíj je'ej a'íjci jimi i tyaj jimi séeria'aj tá'ju'un tí'ij huataséjre'en i tavástara'.

19 Ajta ti'ij na'aj i ti a'yan tyí'sejre' i Dios ti tyú'taahuaca', a'íi mu jajchó've' a'ájna xicáara' ti'ij i Dios huatóosejrata ityájma jimi i tyaj yójmua'mua' pué'een.

20 Ji'nye néijmi'i ti'ij na'aj tyí'sejre' seequéj pu tyi'huóo'ruu ti'ij quee a'yan éenye'ej tá'ra'nyij je'ej ti tyá'xie'va'ca'aj i Dios, capu jusíij a'yan huóoruuj, sulu Dios pu juxié'vi'ra' jin a'yan tyeetyájtóo ti'ij jaajájuare'en majca'huáyee,

21 néijmi'i i ti tyí'sejre' pu tyi'ijchó've' a'ájna xicáara' ti jitzán Dios jaatyáhuire'ej, ti'ij ajta tajamuán séeria'aj já'ra'nyij i tyaj yójmua'mua' pué'een.

22 A'yaa tu tyá'mua'reej ti a'yan tyí'een jo'tij na'aj i cháanacaj japua ti a'yan tyu'puéjtzij ti'ij tipua'aj íitaj ootacuí'nyej.

23 Tyajta ityáj a'yaa tu tyajta tya'ajpuéetzij, ji'nye pu'ríj ityájma jimi séejre' i júuricama'ra' i Dios, ti a'íin pué'een i ta'nájcaj ti Dios a'yan tyita'táratziiri'. Jéehua tu jajpuéetzij a'yan tyetye'ejcho've'ej ti'ij táaci'tyij tyaj yójmua'mua' pué'eenye'ej tá'ra'nyij i Dios, ti'ij ajta i Dios japan huatányuunyij i tatyévira'.

24 A'yaa pu een jin Dios tii'rájtoó tyej a'yan tye'ejchó've'ej a'íjci i tyaj quee xu jaséj. Ajta tipua'aj tyeríj jaséjraj i tyaj jajchó've', capu che' juxie've' tyaj jacho'va'aj. ¿Nyi a'tíj tyi'tíj tyicho've' ti arí jaaséj?

25 Ajta tipua'aj i tyaj jajchó've' tyequée xu jaséjraj, a'yaa pu tyúuxie've' tyaj jacho'va'aj tyequée tyá'xaahuataj.

26 A'yaa pu'ij ajta i júuricama'ra' i Dios

tyí'tahuiire' a'íjci jime' tyaj quee je'ej rinyij tajímua'aj. Ji'nye catu jamua'reej tyi'táj ti nyúucarira' juxie've' tyej tyij huatyényuunyij, a'íj pu jin i júuricama'ra' i Dios tajitzé ma'can tyényuusij, a'yaa pu tyó'ci'xij tí'ij i tiquee tya'ancurí'rej, ji'nye capu i'ríj ti a'táj jaataxáj.

²⁷ Ajta a'íjna i Dios ti néijmi'i mua'reej je'ej tyaj tyí'mua'tzej i tatzájta', a'íi pu jamua'reej je'ej ti huatóomua'aj a'íjna i ti jahuoo i júuricama'ra', ji'nye a'íi pu hua' japua huatányuusij je'ej ti i Dios tyá'xie've'.

Néijmi'i tu jin tyu'tyámue'tij i Dios jimi

²⁸ A'yaa tu tyá'mua'reej ti Dios huá'huiire' tí'ij néijmi'i a'yan tye'rájra'nyij je'ej ti a'íin tyámua' tyihuo'tá'an a'íijma i maj jaxie've', a'íijma i ti arí a'íin hua'antyíhuoj tí'ij tyi'táj jin tyihua'antyárujtye'en.

²⁹ Ajta a'íijma i ti Dios jájcuaj imuáj arí huá'muajtyajca'aj, a'yaa pu tyihua'antyíhuoo tí'ij a'yan huó'uurej tí'ij a'íjna i yójra', ajta tí'ij a'íin pue'éenye'ej tá'ra'nyij i ta'nájcaj a'íijma jimi i ihuáamua'mua'.

³⁰ Ajta a'íijma i ti a'yan jájcuaj imuáj tyihua'antyíhuoo, a'íi pu ajta huo'tajé, ajta a'íijma i ti huo'tajé, a'íi pu tyámua' huó'ruuj mej mij ji'réenya'aj huatyá'itzeere'en a'íjci jimi, ajta a'íijma i ti tyámua' huó'ruuj, a'íi pu huo'ta' mej mij jamuán séjre'ej muá'ra'nyij jusén jime'.

³¹ ¿Ji'nye tyajtáhua'aj tyu'taxájtaaj? Típua'aj i Dios tajapuá nyuucacaj, capu i'ríj ti a'táj ta'antypuá'ritye'en ityájma.

32 Capu i Dios quee a'yan tyito'tyéchootzej i juyój, sulu a'ñ pu tyu'tá' ti'ij huámu'i'nyij tajitzé ma'can i cúruuj jitze, ¿nyiquee a'yan cha'taj na'aj ij juxié'vi'ra' jin néijmi'i tyitaatapuéjve'sij, i ti tyí'sejre' i Ciríistu' jimi?

33 ¿A'tanyíj a'yan tyihuá'xajtzi' a'ñjma i Dios ti hua'antyíhuoj? Dios pu a'ñ pu'é'een i ti tyámua' huá'uurej.

34 ¿A'tanyíj puéjtzij huo'tá'sij? A'ñ pu a'ñ pu'é'een i Ciríistu' ti huamuí', ajta je'en hu-atájuuriaca', ijíj pu muáca'ta' i Dios já'sejre', a'ñ pu'ij taatyáhuüre'ej.

35 ¿A'tanyíj ij tye'entyí'uunaj ti'ij i Ciríistu' quee che' taxie've'ej? ¿Nyiquij tipua'aj tyi'táj tamuarie'riste'ej, na'ríj tyi'táj ta'itziitya'aj, ca' tipua'aj je'ej pua'aj máta'uuriaj, nusu tyatájcuuj, ca' tipua'aj tyej quee je'ej tyéejviicue'raj, ca' tipua'aj tyaj huácui'nyij?

36 A'yaa pu tyé'yu'si' i yu'xarij jitze tijin:
Muéetzij jime' tu a'náj tina'aj á'taca'nyej tyej tyij huácui'nyij,
a'yaa mu ta'uurej mati'ij a'ñmaj i cánya'xii i maj huá'cui'caa.

37 Ajta néijmi'i jime' a'íjci, a'yaa tu tyu'tyámue'tij a'íjci jime' ti i Ciríistu' taaxié'vej.

38 A'yaa nu tyámua' tyá'mua'reej tiquee tyi'táj tye'entyí'uunaj ti'ij quee che' i Dios taxie've'ej. Capu i tyaj júurij huatyá'itzeere'en, na'ríj tyaj huácui'nyij, na'ríj i maj tajapuá tyi'huüre' i Dios jimi, na'ríj a'ñmaj i maj tyí'huüre' i tyiyáaru' jimi, je'ej ti tyí'ricij i ti tyí'sejre', nusu je'ej ti tyí'rinyij,

³⁹ tipua'aj i ti jéetze' ájtyeej, na'ríij i ti jéetze' ajo'cátyee i tajityé, tyi'táj tina'aj ti a'yan séejre' i Dios ti tyú'taahuaca'. Capu tyi'táj tye'entyí'uunaj i Dios ti jin taxie've' ajta taataséjratyey i Ciríistu' jimi, a'íjna i Jesús ti tavástara' pué'een.

9

Dios pu hua'antyíhuoj a'íjma i maj Israel jitze ajtyáma'can

¹ A'yaa nu tzáahuatyira'aj jin tyajá'mua'ixaatye' i Ciríistu' jimi, canu tyi'hue'taj. Ajta i nyaj jin ma'úumua'rej jamuán i júuricama'ra' i Dios, a'yaa mu tyí'nye'ixaatye' ti a'yan tyi'ja'yájna,

² jéehua nu nyaxaamujritye', nyajta a'náj tina'aj jajpuéjtzij i nyaxiéjnyu'caa tzajta',

³ a'yaa nu tyá'xie've' tipua'aj i'ríitan na'ránajchij ti Ciríistu' manúurieenyij, ti'ij na'antypuá'ritye'en hua' jitze ma'can i nye'ihuáamua', a'íjma i maj a'yan cha'taj mana'aj tyitye'ráanyej nyati'ij nyáaj.

⁴ A'íi mu Israel jitze ajtyáma'can, ajta i Dios huatyóoyojmua'tyej. Dios pu ajta huatyá'itzee hua' jimi a'íjna ti naa séeria'aj ta'raa, ajta hua' jimi tyu'tá' i junyúucaa je'ej ti tya'ra'nyíiche', majta a'íimaj, a'yaa mu tya'ancuriáa' a'íjci i nyúucarij i maj jin tyí'ijta, majta a'íjci i yi'ráj je'ej maj tyá'na'michej, ajta mui'caa jin tyihua'táratziiri'.

⁵ A'íi mu majta hua' jitze eeráma'can i tahuásimua'ci'ij, ajta hua' jitze pu a'yan tye'ráanyej a'íjna i Ciríistu' ti ajta a'íin pué'een i

Dios i ti néijmi'i jin antyúumua'reej, tyiche' a'náj tina'aj tyé'tyójtzi're'ej. Che' a'yan tyá'ra'nyij.

⁶ Canu a'yan tyajá'mua'ixaatye' ti i nyúucarij quee tyi'tíj huiiria'ca'aj i Dios ti huo'ta' a'íjma i maj Israel jitze ajtyáma'can, sulu a'íimaj i maj a'íjci jitze eeráanye'ej i Israel, camu néijmi'i jiré'can jime' a'íjci jitze ajtyáma'can.

⁷ Camu majta néijmi'i yójmua'mua' pué'een a'íjci i Abraham, sulu Dios pu a'yan tyaaté'exaatya'ca'aj tijin: “A'íi mu a'íin pué'eenye'ej muá'ju'un a'yóojmua' i maj jitzán eerányesij a'íjci i Isaac.”

⁸ A'yaa pu'ij tyi'ta'ixaatye' maj quee néijmi'i yójmua'mua' pué'een i Dios i maj Abraham jitze eeráanye'ej, sulu a'íimaj i maj ja'tzaahuatye' a'íjci i ti jin Dios tya'tóoratziiri', a'íi mu a'íin pué'een i maj yójmua'mua' pué'een a'íjci i Abraham.

⁹ Ji'nye Dios pu a'yan tya'tóoratziiri' a'íjci jimi i Abraham tijin: “A'náj nyaj nyeríj a'yan tyaaxá'pui'intarej, nyáaj nu nyajtáhua'aj ya'uvé'nyesij, ajta i Sara pu arí tyiyóoj ta'mej.”

¹⁰ Ajta quee a'íi na'aj. A'íimaj i maj hua'puaj i yójmua'mua' i Rebeca, a'íi pu a'íin pué'eenye'ej i hua' táataj a'íjna i Isaac,

¹¹ Ajta mati'ij quee xu nánie'huacaj i maj hua'puaj, mati'ij quee xu tyi'tíj je'ej uuriáacaj, tipua'aj ti xá'pui' een, na'ríj ti je'ej pua'aj een, a'yaa pu Dios tyaaté'exaa a'íjci i hua' náanaj tijin: “A'íjna ti vásti', a'íi pu jaatyáhuire'ej a'íjci i ti pá'ri'ij.”

¹²⁻¹³ Ajta a'yan tijin: “Nyáaj nu jaxie've' a'íjci Jacob, nyajta jájcha'ire' a'íjci i Esaú.” A'yaa

pu'ij tyé'miteere' je'ej ti ricij i Dios ti'ij a'ín séej avá'huoonyij, je'ej ti a'ín tyá'xie've', ajta quee a'yan tyaataxáatan je'ej ti tyi'táj jin huaríj.

14 ¿Nyij a'íjci jin a'yan tyetyu'taxájtaj ti i Dios quee xá'pui' ricij? Catu xaa nyu'uj.

15 Ji'nye Dios pu a'yan tyaaté'exaa a'íjci i Moisés tijin: “Nyáaj nu tyaatú'uunyi'raj a'táj tina'aj ti a'yan tyina'ráanajchi, nyajta nu ja'ancu'vaxi'ij a'táj ti ajta a'yan tyina'ráanajchi.”

16 A'yaa pu'ij, capu a'yan tyá'ci'tyij i a'táj a'íjci jime' je'ej ti jusíj tyá'xie've', nusu je'ej ti tyi'táj jin tyi'tyese', sulu je'ej ti i Dios tyá'ancu'vaxi'ij.

17 Ji'nye a'yaa pu tyé'yu'si' i yu'xarij jitze ti i Dios a'yan tyaaté'exaa a'íjci i rey Egipto ti tyejé'ijtaca'aj tijin: “A'yaa nu rey jime' tyimua'antyaárujtye nyej nyij a' jimi huo'taséjratye'en i nyaj jin néijmi'i putyí'uurej, ajta mej mij néijmi'que' náamua'tyij íyan i cháanacaj japua.”

18 A'yaa pu'ij i Dios tyá'cu'vej a'táj ti a'yan tya'ráanajchi, ajta a'yan tya'tá'caa ti a'táj a'yan tye'tyánaamuan i juxiéjnyu'caa a'táj ti ajta a'yan tya'ráanajchi.

19 Ajta a'táj pu a'yan tyu'taxájtaj tijin: “Tipua'aj a'yan tyi'ja'yájnatan, ¿ji'nye een jime' i Dios tajitzé tyi'pua'ritye', tìpua'aj a'ín jusíj a'yan ta'uurej?”

20 ¡Pajta muáaj tyáati! ¿A'tanyíj paj pué'een pej pij a'yan tyi'anyuuste' i Dios jimi? ¿Ny-iquij i xá'rij a'yan tyaaté'exaatye'sij a'íjci i ti jaatyátaahuaca' yee: “Ji'nye een jime' a'yan petyinatyátaahuaca'?”

21 A'íjna i a'tíj ti xá'rij tyí'ta'huacaa, a'yaa pu tyu'tóoci'puaj ti tyu'muárie'en i xaríj jime', tí'ij séecan tyú'taahuaj i xá'rijtze ti naa tyu'sé'rin, ajta séecan ti cha'na'aj tina'aj tyí'huiire'.

22 Dios pu a'yan tyá'xie've' ti taataséjratye'en ti a'íin néijmi'i putyí'uurej, a'íj pu jin néijmi'i tyo'táviicue'ri' a'íjma jimi i ti a'yan tyi-hua'tyévijtya'ca'aj mej mij jó'vetyij.

23 A'yaa pu'ij ajta ityájma tyitaataséjra ti a'íin tyámua' tyihuo'tyájtóo a'íjma i ti hua'ancu'vajxi, ajta anaquéej tyámua' táaruuj tyej tyij hua' jitze ajtyáma'cantaj tá'ra'nyij.

24 A'yaa pu i Dios tyitaatajé, ityájma i tyaj Israel jitze ajtyáma'can, ajta a'íjma i maj séej chuéj japua já'ma'can.

25 A'yaa pu ajta tyo'tyéyu'xaca' i yu'xarij jitze a'íjna i Oseas tíjin:

A'íimaj i maj quee nyejitzé ajtyáma'cantaca'aj,
 a'yaa nu huo'támua'sij tíjin mu'ríj
 nyetyeítyeristyamua' pué'een,
 nyajta a'íjma i nyaj quee hua'xie'va'ca'aj,
 a'yaa nu nyajta tyihuo'taxájtaca' tíjin nyaj
 hua'xie've'.

26 Ajta jo'maj a'yan tyihuojo'té'exaa i tyeítyee yee:

“Mua'aj xu quee nyetyeítyeristyamua' pué'een”,
 a'yaa mu tyihuo'taxájtaj maj yójmua'mua'
 pué'een i Dios ti júurij.

27 Ajta a'íjma i maj Israel jitze ajtyáma'can, Isaías pu a'yan tyihuo'té'exaa tíjin: “Tyij majta jéehua i maj Israel jitze ajtyáma'can, a'yan a'chu tí'ij i séj ti a'áa ja'ajtyájcaj jo'tij ja'va'ástimee i

jájrjij, capu néijmi'caa huiire'en ti'ij i Dios hua' japua huatányuunyij,

²⁸ ji'nye jiye'tzín pu i Dios néijmi'i antyupúa'ritye'sij ti'ij puéjtzij huo'tá'an a'íjma i maj a'yan huacháatimee i cháanacaj japua."

²⁹ A'yájna ti'ij ajta arí tyu'taxájtaca' a'íjna i Isaías tijin:

Típua'aj i Dios ti néijmi'i jin antyúumua'reej
 quee taatá'nyijche',
 tyej tyij séecan jitze eerama'cáantaj, a'yaa pu'ij
 ajta tyi'ta'uréenyijche',
 ti'ij tyihuó'ruuj i maj a'áa jo'cháatima'caa a
 Sodoma majta a Gomorra.

I maj jin ootyá'itzee i maj Israel jitze ajtyáma'can

³⁰ ¿Ji'nye tyetyu'taxájtaj a'íjna jime'? Nyiquij a'íjna jime' i tyaj jin tyá'tzaahuatye', i Dios tyámua' huó'ruuj i maj quee tyá'tzaahuatye', i maj majta jahuocca'aj mej mij ji'r'é'nye'ej huatyá'itzeere'en i Dios jimi.

³¹ Majta a'íimaj i maj Israel jitze ajtyáma'cantaca'aj, i maj a'yan tyá'huocca'aj i nyúucarij jitze i maj jin tyí'ijta mej mij ji'r'é'nye'ej huatyá'itzeere'en i Dios jimi, a'íi mu quee ja'ancuriáa' i maj jahuocca'aj.

³² ¿Ji'nye een jime' mequee ja'ancuriáa'? A'yaa mu een jin huamué'tichej maj quee a'íjna jitze tyi'ca'nyajca'aj i maj jitzán tyá'tzaahuatye', sulu je'ej maj tyi'tíj jin rijcaa.

³³ A'íj mu jin huamué'tichej a'íjci jime' maj jaatyáxaahuataca' a'íjci i ti a'yan tyé'yu'si' i yu'xarij jitze tijin:

Nyáaj séej tyéviij huata'ítyij a Sión,
 a'yaa pu tyinaatyáhuüre'ej tí'ij i tyetyéj i maj
 jitzán éjcataj i tyétyacaa,
 ajta i ti jitzán tyí'ca'nyej capu jaatatyévi'raste'sij.

10

¹ Nye'ihuáamua', a'yaa nu tyá'xie've' i nyaxiéjnyu'caa tzajta', nyajta a'yan tyá'huaviiij i Dios tí'ij a'ín hue'rátoonyij i maj Israel jitze ajtyáma'can.

² A'yaa nu tyámua' tyá'mua'reej siaj jéehua jaxie've' siaj jaatyáhuüre'en i Dios, ajta a'íjna i siaj jin jaxie've' siaj sij a'yan huárinyij capu a'íjna jitze aróoca'nyej i ti jì'ré'can jime'.

³ Jì'nye caxu jamua'reej tí i Dios a'ín pué'een i tí tyámua' huá'uurej i tyeítýee, jujímua'aj xu sij a'yan tyá'huoo siaj sij jì'ré'nye'ej hu- atyá'itzeere'en, siajta quee a'yan ricij je'ej tí i Dios tyaaxá'pui'intarej tí'ij a'tíj jì'réenya'aj jimi huatyá'itzeere'en a'íjci jimi.

⁴ Ajta a'íjna i nyúucarij i maj jin tyí'ijta a'í pu antyipuá'riaca' tí'ij i Ciríistu' yan uvé'nyej, a'yaa pu'ij tyí'rij siaj néijmi'i tyámua' tyityeetyá'itzeere'en a'íjci jime' siaj tyá'antzaahuatye'en i Ciríistu' jimi.

⁵ Ajta tí'ij a'tíj tyámua' tyu'tyá'itzeere'en a'íjna jitze ma'can i nyúucarij i maj jin tyí'ijta, Moisés pu a'yan tyo'tyéyu'xaca' tíjin: "A'tíj tí ja'rá'astijre'en a'íjci i nyúucarij i maj jin tyí'ijta, a'yaa pu tyúuxie've' tí néijmi'i a'íjci jitze aróoca'nyej i nyúucarij."

6 Ajta i ti jin a'tíj tyámua' tyu'tyá'itzeere'en a'íjna jimi i maj jitzán tyá'tzaahuatye', a'yaa pu tyá'xaj tijin: “Capáj a'yan tyí'mua'ajcaj mua' tzajta' yee: ¿A'tanyíj tajapuá jo'ojnyésij?, ta'aj ij yajava'cányijtye'en a'íjci i Ciríistu'”,

7 na'ríij yee; ¿ajo'cárutyij tyétye' imuáj?, ta'aj ij je'tátoonyij i Ciríistu' hua' tzajta' i maj meríj huácuuj.”

8 Tyi'tanyí na'aj putyí'xaj i ti a'yan yee: “A'íjna i nyúucarij a jimi pu séejre', ajta a'íjci jitze i paj jin ma'úumua'rej ajta a'xiéjnyu'caa tzajta'.” A'íi pu a'íin pué'een i nyúucarij tyaj jitzán tyá'tzaahuatye' tyajta huá'ixaatye'.

9 Tipua'aj a'yan petyu'taxáj yee Jesús pu tavástara' pué'een, pajta a'xiéjnyu'caa tzajta' tyá'antzaahuatye'en ti i Dios jaatájuurityej, aj pu i Dios mui'rátosij.

10 A'yaa pu tyúuxie've' paj a'xiéjnyu'caa jin tyá'antzaahuatye'en ti'ij muáahuiire'en, pajta mua' tyenyij jin jaataxáj ti i Jesús a'íin pué'een i Ciríistu', aj pu'ij Dios a japua huatányuusij.

11 A'yaa pu tyé'yu'si' i yu'xarij jitze tijin: “A'tíj ti tyá'tzaahuatye' i Ciríistu' jimi, capu a'náj huatóotyevi'ra'astaj.”

12 Majta juxa'aj mana'aj een i tavástara' jimi, a'íimaj i maj Israel jitze ajtyáma'can, majta i maj séej chuéj japua já'ma'can, ji'nye síj pu'uj a'íin pué'een i ti néijmi'caa tavástara', ajta néijmi'i tyihua'tá'caa je'ej ti síj ajta síj tyaatáhuaviiraj.

13 Ji'nye a'yaa pu tyé'yu'si' tijin: “A'tíj tina'aj ti a'yan tyaatáhuosij i tavástara' jimi, Dios pu japuan huatányuusij.”

14 Ajta ¿ji'nye tyí'rij maj huatyényuunyij i tavástara' jimi, tipua'aj mequee xu jimi tyá'tzaahuatye'? ¿Ajta ji'nye tyí'rij mej mij jimi tyá'antzaahuatye'en, tipua'aj mequee xu jáanamujri' ti a'tíj jitzán ma'can tyihuó'ixaatye'en? ¿Ajta ji'nye metyá'namujran, tipua'aj quee a'tíj huó'ixaatye'en i nyúucaria'ra' i Dios?

15 ¿Ajta ji'nye metyihuá'ixaatye'en i nyúucarij tipua'aj mequee huata'ityi'huaj mej mij hua' jimi ujó'ju'? A'íj pu jin a'yan tyé'yu'si' i yu'xarij jitze tijin: "Huápu'i'ij mu naa huasé'rin a'íimaj i maj huata'ityi'huaj mej mij huó'ixaatye'en i nyúucaria'ra' i tavástara'."

16 Ajta camu néijmi'i ja'antzaahuaj i nyúucaria'ra' i Dios. A'yaa pu tyí'een ti'ij tyu'taxájtaca' a'íjna i Isaías tijin: "Tavástara', ¿a'tanyíj ja'antzaahuatye'sij i nyúucarij i tyaj tyeríj huo'té'exaa?"

17 A'yaa pu'ij tyí'een, aj pu i a'tíj tyá'antzaahuatye'sij ti'ij jáanamuj i nyúucarij, ajta a'íjna i nyúucarij a'íj pu jimi eeráma'can i nyúucaria'ra' jitze i Ciríistu'.

18 Nyajta nyáaj a'yaa nu tyí'ihuo' tijin: ¿Nyiquij mequee jáanamujri' i nyúucarij? Ji'nye mijta máanamujri'. A'yaa pu tyá'xaj i yu'xarij jitze tijin:

Néijmi'que' pu huánamujre i huá'nyuucaa, ajta huá'nyuucaa, a'áa pu imuáj jó'namujrej jo'tij i cháanacaj joo'ástimee.

19 Nyajtáhua'aj nu a'yan tyu'ta'íhuo'sij tijin: ¿Nyiquij mequee jáamua'reeri' a'íimaj i maj

Israel jitze ajtyáma'can?, anaquéej pu i Moisés a'yan tyu'taxájtaca' tijin:

“Nyáaj nu jamuaatá'sij siaj sij tyíchueerej a'íjma jimi i maj quee chájta'naj pué'een, nyajta jamuaatá'sij siaj tyinyínyu'caj a'íjma jimi i maj quee jaxie've' maj tyihuojo'itéej muá'ra'nyij.”

²⁰ Ajta i Isaías, a'yaa pu tya'huóoca'an ti a'yan tyu'taxáj tijin:

A'íimaj i maj quee nyahuoca'aj, a'íi mu náatyoj, nyajta a'íjma jimi huatányesejrataca' i maj quee nyéetzij nye ihuo'ca'aj.

²¹ Ajta i Isaías a'yaa pu tyihuo'taxájtaca' a'íjma i maj Israel jitze ajtyáma'can tijin: “A'náj tina'aj nu huo'tyáhuui i maj séej chájta'naj jitze ja'chej i maj quee tyu'namuaj majta quee tyihuojó'itej.”

11

I Israel Dios ti ja'antyíhuoj

¹ A'yaa nu nyijta ijíj tyajá'mua'ihuo': ¿Nyiquij i Dios arí mahuoohuá'xij a'íjma i maj tyeítyeristyamua'me'en pué'een? Capu xaa nyu'uj. Nyáaj nu nyajta Israel jitze ajtyáma'can, nyajta i Abraham jitze eeráma'can, nyajta hua' jitze ajtyáma'can a'íjma i maj Benjamín jitze eeráma'can.

² Tí'ij na'aj jájcua imuáj, Dios pu a'yan tyihuo'taxájtaca' a'íjma i maj Israel jitze ajtyáma'can maj tyeítyeristyamua' pué'eenye'ej, ajta ijíj capu eexúj mahuoohuá'xij. ¿Nyij sequée jamua'reej je'ej ti tyé'yu'si' i yu'xarij jitze a'íj ti á'xaj i Elías, tí'ij a'yan tyaatáhuaviiri' i Dios tí'ij

a'íin puéjtzij huo'tá'an a'íjma i maj Israel jitze ajtyáma'can? A'yaa pu tyu'taxájtaca' tijin:

³ “Nyavástara', mu'ríj huo'cuij a'íjma i maj muéetzij jitze ma'can tyí'xaj, majta jaatyú'uunaxij i maj japuan tyí'mu'vejritacaa, nyáaj nu'uj nyij nyasíj huatyá'ítzee nyajúurij, majta mu mij nyéetzij meríj nyeje'catamui'.”

⁴ Ajta i Dios a'yaa pu tyu'tanyúj tijin: “Nu'ríj aráahua'puaj ví'ra'aj i tyeítjee ava'huoj i maj quee a'náj jaanájchaca' a'íjci i Baal.”

⁵ A'yaa mu cha'taj mana'aj cí tyí'tyesejre' ijíj i maj tyeítjeristyamua'me'en pué'een, a'íimaj i ti Dios juxié'vi'ra' jin hua'antyíhuoj.

⁶ Ajta tipua'aj i Dios hua'antyíhuoj juxié'vi'ra' jime', capu che' a'íjna jime' je'ej maj tyityetyúucha'íica'aj, ji'nye tipua'aj a'yan tyí'eenye', capu che' tyí'tíj je'ej tyí'huiire' i ti jin Dios hua'antyíhuoj juxié'vi'ra' jime'.

⁷ ¿Ji'nye na'quij? A'íimaj i maj Israel jitze ajtyáma'can camu ja'ancuriáa' i maj jahuocaa'aj, majta a'íimaj i Dios ti hua'antyíhuoj, a'íi mu xaa ja'ancuriáa'. Ji'nye i séecan huápuí'ij mu quee tyihuojó'iteeca'aj,

⁸ a'yájna tí'ij tyá'xaj i yu'xarij jitze tijin: “Dios pu a'yan huó'ruuj mej mij quee tyámuamua're'ej, a'yaa mu mij móoj ijíj een, capu je'ej huá'miteeraste' i maj jaséj camu majta yó'itej i maj janamuj.”

⁹ A'yaa pu ajta tyaataxájtaca' a'íjna i David tijin:

Miche' a'íjna jin huavívi'huaj i maj jin tyí'ye'estyaa,

mej mij jó'vatzij ajta je'en puéjtzij huo'ci'tyij.

¹⁰ Miche' aracúcu'nyij muá'ra'nyij mej mij quee che' ma'unyéjnye'rij, Che' i hua' huarij antyúututaj jusén jime'.

Dios pu hui'rátoosij a'íjma i maj séej chuéj japua já'ma'can

¹¹ A'yaa nu nyijta ijíj tyajá'mua'ihuo' tíjin: ¿Nyiquij huápu'i'ij néijmi'i jin muo'vátzij i maj Israel jitze ajtyáma'can ti'ij hua' japua rájve i puéjtzij? Capu xaa nyu'uj. Sulu mati'ij a'íimaj quee a'yan huaríj i maj Israel jitze ajtyáma'can, a'íjma pu'ij huáhuüi i maj séej chuéj japua já'ma'can mej mij júurij huatyá'itzeere'en, ajta mej mij a'íjna jin tyíchueerej i maj Israel jitze ajtyáma'can.

¹² A'yaa pu'ij tyu'tyáhuüi a'íjna i maj jin hua-mué'tichej a'íimaj i maj Israel jitze ajtyáma'can, mej mij a'íjna jin huo'tyáhuüire'en a'íjma i maj séej chuéj japua já'ma'can, jéetze' pu'ij tyámua' tye'mej a'íjma jimi a'ájna xicáara' ti'ij tyámua' huá'uuren a'íjma i maj Israel jitze ajtyáma'can.

¹³ Ajta tyi'tíj nu jamuaaté'exaatye'ej mua'ajmaj mu siaj quee Israel jitze ajtyáma'can. Ji'nye Dios pu a'íjma jimi naata'ityaca' i maj quee Israel jitze ajtyáma'can, a'íj nu jin jéehua jaxie've' nyaj a'íjna jin jamuaatyáhuüire'en.

¹⁴ A'yaa nu tyá'xie've' mej mij séecan i nyetye'ityeristyamua' jamua'anchueere'en mua'ajmaj, mej mij majta a'íimaj tyá'antzaahuatye'en.

¹⁵ Ji'nye ti'ij i Dios mahuoohuá'xij a'íjma i maj Israel jitze ajtyáma'can, a'yaa pu tyu'tyáhuüi mej

mij majtáhua'aj ajtyáxiirej i Dios jimi a'íjma i maj séej chuej japua já'ma'can, ¿ji'nye tye'mej tí'ij i Dios ajtáhua'aj tyámua' tyihuo'tyéjeevej a'íjma i maj Israel jitze ajtyáma'can? A'yaa pu tye'mej tí i Dios huo'tájuuritye'sij a'íjma i maj meríj huácu'i'ijcaa

¹⁶ Ji'nye tìpua'aj a'tíj jaatámu'vejritaj i Dios jimi a'íjna i páan i tí anaqueéj jaatyátaahuaca', néijmi'i pu ajta i cuéjtzi j huatámu'vejrityi'huaca'. Tìpua'aj i Dios jimi huatámu'vejrityi'huaj i náana'ra' i ciyéj, néijmi'i pu i ciyáara' ajta huatámu'vejrityi'huaj.

¹⁷ A'íjna i aseitúnaj, i maj a'ín pué'een i maj Israel jitze ajtyáma'can, a'yaa mu je'cácaa tye'entyiná'xij i pi'istáara', majta je'en séej antyiví'ijtye i pi'istáa tí séej jitze ma'cantaca'aj i aseitúnaj tí jusíj ajnyéj, mua'aj xu a'ín pué'een. A'yaa xu seríj a'íjci jitze tyitye'ejtyáma'can i aseitúnaj, i Dios tí jimi ajtyáma'can.

¹⁸ Ajta caxu a'íjna jin óotzaahuatye'ej, siaj seríj a'íjci jitze ajtyáma'can. Tìpua'aj a'yan siarijca, xo'támua'reej tíquee mua'ajmaj jitze aróoca'nyej i náana'ra' a'íjci i ciyéj, sulu mua'aj xu a'íjci jitze aróoca'nyej i náana'ra'.

¹⁹ Tyij sequée a'yan tyu'taxájtaj yee: “Séecan mu i pi'istáa antyiná'axij mej mij nyéetzij na'antyyiví'ijtye'en i ciyéj jitze.”

²⁰ A'yaa pu tyi'ja'yájna, ajta a'yaa mu huó'ruuj ji'nye camu tyá'tzaahuatya'ca'aj, siajta mua'aj a'yaa xu a'íjci jitze tyitye'ejtyáma'can a'íjci jime' siaj tyá'tzaahuatye'. A'íj xu jin quee

óotzaahuatye'ej, sulu siata'aj jáatzihnye'en i Dios.

²¹ Ji'nye capu i Dios tyaatú'uunyi'ri' a'íjci i pi'istáa i ti ajtanyáxij i ciyéj jitze ti tyámua' een, capu ij ajta mua'ajmaj tyajamuaatú'uunyi'raj.

²² Siata'aj a'íjci jitze tyú'mua'tyij i ti jin i Dios jamua'ancu'vaxij, ajta ca'nyiin jin tyí'ijta. Ca'nyiin pu jin tyihuo'ta'íj a'íjma i maj ootyá'itzee, ajta mua'ajmaj jamua'ancu'vaxij. A'yaa pu'ij tyúuxie've' siaj a'íjci jitze aróoca'nyej i ti jime' i Dios tyámua' tyajamuaatá', na'ríj sequée a'yan huárinyij a'íi pu ajta majamúuhua'xij.

²³ Ajta tìpua'aj a'íimaj i maj Israel jitze ajtyáma'can majtáhua'aj tyá'antzaahuatye'en, Dios pu ajtáhua'aj hua'antyiví'ijtye'sij, ji'nye a'íi pu jaayí'tin ti a'yan huárinyij.

²⁴ Ji'nye mua'ajmaj pu i Dios jamua'antyina'xij a'íjci jitze i ciyéj ti jusíj ajnyéj, ti'ij jamua'antyiví'ijtye'en a'íjci jitze i séej i maj ja'tyáhuii, majta a'íimaj i maj Israel jitze ajtyáma'can, i maj anaquéej ajtyáma'cantaca'aj a'íjci jitze i ciyéj, jéetze' pu'ij i'ríj ti i Dios ajtáhua'aj hua'antyiví'ijtya'xi'in a'íjci jitze i ciyéj, mej mij majtáhua'aj jitzán ajtyama'cántaj muá'ra'nyij.

Tí'ij Dios hui'rátosij a'íjma i maj Israel jitze ajtyáma'can

²⁵ Nye'ihuáamua', a'yaa nu tyá'xie've' siaj yo'itéej xá'ra'nyij a'íjna i ti aviitzi' i Dios jimi, siaj sij quee tyi'tíj jin óotzaahuatye'ej. A'íimaj i maj Israel jitze ajtyáma'can je'cáj mu quee

tyihuojó'itej, a'yaa pu tyihuó'ruuj mej mij séecan tyá'antzaahuatye'en i maj quee Israel jitze ajtyáma'can.

²⁶ Tí'ij a'yan tyá'ra'nyij, néijmi'caa pu huiire'en a'íjma i maj Israel jitze ajtyáma'can, ji'nye a'yaa pu tyé'yu'si' i yu'xarij jitze tijn:

A'íjna i ti hui'rátosij a'áa pu jo'va'ma'aj ja'mej a Sión,

ajta je'en huo'tyáhuire'sij a'íjma i maj Jacob jitze eeráma'can.

²⁷ A'íi pu a'ín pué'een i nyaj jin tya'tányaratziiraj a'íjma jimi

nyati'ij tyihuo'tú'uunyi' i maj jin quee xá'pui' huaríj.

²⁸ Ajta a'íjna jitze ma'can i nyúucarij i ti jin i Dios hui'rátosij, a'íi mu jájcha'íire' i Dios i maj Israel jitze ajtyáma'can, a'yaa mu a'íjci jin huaríj tí'ij ajta mua'ajmaj jamuáahuire'en, ajta i Dios óoche' pu hua'xie've' a'íjma, ji'nye a'íjma pu antyíhuo i hua' huásimua'ci'ij.

²⁹ Ji'nye i ti Dios huo'ta', capu huári'raj, capu ajta jo'rio'uunaj i nyúucarij i ti jin huo'tajé.

³⁰ A'ájna imuáj xu siajta mua'aj quee ja'rá'astijrej i Dios, ajta ijíj maj quee já'astijre' i maj Israel jitze ajtyáma'can, Dios pu'ij arí ajta mua'ajmaj jamua'ancu'vaxij.

³¹ A'yaa mu cha'taj mana'aj mij ijíj quee tyá'astijre', ta'aj ij i Dios jamua'ancu'vaxi'in, ajta je'en hua'ancu'vajxi a'íjma a'yájna tí'ij arí mua'ajmaj tyajamuá'ancu'vaxij.

32 Ji'nye Dios pu juxa'aj na'aj tyihuo'xíjtyej i maj jin ootyá'ítzee a'íjci jimi, a'yaa pu'ij ajta juxa'aj na'aj néijmi'caa tyá'ancu'vaxi'sij.

33 Jéehua pu huápu'i'ij tyu'yí'tin i Dios, néijmi'i pu tyo'mua'reej. Capu a'tíj jaayí'tin ti jaataxáj je'e'j ti a'íin tyá'xa'pui'intare', nusu ti yo'itéej já'ra'nyij je'e'j ti ajóo'en i Dios jimi.

34 ¿A'tanyíj jamua'reej je'e'j ti een i mua'tzíiria'ra' i Dios? ¿A'tanyíj jaayí'tin ti tyámua' tyée'ixaatye'en?

35 ¿A'tanyíj anaquéej tyi'tíj jaatá' i Dios ti'ij a'yan tyúuxie've'e'j ti jaatátuiire'en?

36 Ji'nye néijmi'i pu a'íjci jimi tyajá'ma'can i Dios, a'íi pu néijmi'i tyú'taahuaca' ajta néijmi'i jimi tyí'sejre'. Tyiche' a'náj ti na'aj tyé'tyojtzi're'e'j i Dios. Che' a'yan tyá'ra'nyij.

12

Je'e'j maj ye'e'j tyityetyúucha'ij i maj tyá'tzaahuatye'

1 A'yaa nu nyij nye'ihuáamua' tyaja'muahuavij, a'íjna jime' i ti jin i Dios jamua'ancu'vaxij sij a'yan tyityaatóosejrataj ti'ij mu'vejrij ti júurij, i ti ajta naa een i Dios jimi. A'yaa pu tyúuxie've' sij a'yan huárinyij sij sij júurij huatóomu'vejritaj.

2 Caxu che' a'yan tyityetyúucha'íij mati'ij a'íimaj i maj a'yan séejre' i cháanacaj japua, sulu siata'aj seequéj metyityoomuámua're'e'j sjta seequéj tyí'tyechajcaj siata'aj sij jáamua'reej je'e'j ti i Dios tya'ajxié'vi'ra' i ti naa een, i

tì tya'ráanajchi, ajta siaj sij quee tyi'tíj jin á'itzeeria'aj.

³ A'íjci jime' i ti jin i Dios tyinaa'íjcaj juxié'vi'ra' jime', a'yaa nu tyajá'mua'ixaatye' néijmi'caa mua'ajmaj tiquee síj tyi'tíj jin óotzaahuatye'ej. Sulu siata'aj tyámua' metyityoomuámua're'ej, siajta a'íjci jitze tyú'mua'tyij je'ej ti tyi'tíj jin i Dios tyajamuaatajé siati'ij jimi tyá'antzaahuaj.

⁴ Ji'nye a'yájna ti'ij i tatyévira' een, capu síj na'aj i ti jitzán tyí'sejre', capu ajta juxa'aj na'aj tyí'huüre',

⁵ a'yaa tu cha'taj tyana'aj een ityáj, tyij tyajta mui'ij, séej tu'uj tyévira' pué'een i Ciriístu' jimi, a'yaa tutyij séej tyana'aj tyévira' jitze néijmi'i tyitye'ejtyáma'can.

⁶ Ajta i Dios quee juxa'aj na'aj tyitaatá' i tyaj jin jaatyáhuüre'en, sulu a'yaa pu je'ej ti a'íj tya'ránajchaca' séej jimi ajta séej. A'íj pu jin tipua'aj i Dios a'yan tyitaatá'an tyej tyij jitzán ma'can tyu'taxáj, tyiche' jitzán ma'can tyu'taxáj a'chu tyej tyá'tzaahuatye',

⁷ tipua'aj a'yan tyitaatá'an tyej tyij séecan huatyáhuüre'en, tyiche' tyámua' tyihuo'tyáhuüre'en. Ajta i ti a'yan tyaací'ij ti tyihuó'mua'tyej, che' tyámua' tyihuó'mua'tyej,

⁸ ajta i ti a'yan tyaací'ij ti ca'nyíjra'aj huo'tá'an i séecan, che' ca'nyíjra'aj huo'tá'an. Ajta i ti a'yan tyaací'ij ti a'íjma tyu'tapuéjve'en i maj quee je'ej tyéejviicue', che' quee ootzáahuatye'ej a'yan rijcaj, ajta i ti a'íjna jin antyúumua'reej ti tyihuo'ta'íjtye'en, che' tyámua' tyi'tyúucha'íj, ajta a'íjna i ti huá'huüre' i maj japuéjtzitarej,

che' jutyamua've'ej a'yan huárinyij.

9 Siata'aj tzáahuatyi'ra'aj jin huóoxie've'en séej siajta séej. Siajta jaatáxaahuataj a'íjci i ti je'ej pua'aj een, siajta je'en ja'rá'astijre'en a'íjci i ti xá'puí'.

10 Siata'aj a'yan tyityahuóoxie've'en séej siajta séej ti'ij siaj tyámua' naa tyityúu'ihuaamua'taj, siajta tzáahuatyi'ra'aj jujimí tyícha'íij.

11 Xaatyóoca'nyej, caxu ju'xaahuataj siaj jahuiiria'aj i tavástara' a'íjna jitze xa'rooca'nyéej i júuricama'ra' i Dios.

12 Siata'aj huóotyamua've'en a'íjci jime' siaj tyi'ijchó've' i Dios jimi, siajta tyo'táviicue' i siaj jin jajpuéetzij, a'náj tina'aj xu jahuaviiraj i Dios.

13 Siata'aj tyihuo'tá'an tyi'tíj ti i séecan tyihuá'itziitye' i maj ja'mua jitze ajtyáma'can, siajta tyámua' naa tyihuo'tyéjeevej i maj já'muamuaarej.

14 Tyámua' xu naa tyihuo'tyéjeevej a'íjma i maj je'ej pua'aj já'mua'uurej. Caxu puéjtzij hua'tá'care'en sulu tyámua' xu'uj tyihuo'tá'an.

15 Siajta huatóotyamua've'en a'íjma jamuán i maj jutyamua've', siajta huatóoxaamujritye'en a'íjma jamuán i maj juxaamuijritye'.

16 Tyámua' xu huojo'mua'raj séej siajta séej. Caxu óotzaahuatye'ej, sulu siata'aj antyóosiire'en hua' jamuán i maj quee tyi'tíj jin tyityetyu'uj. Caxu a'yan tyityóotzaahuatye'ej yee siaj nu'uj jéehua tyu'yí'tin.

17 Típua'aj a'tíj je'ej pua'aj já'mua'uurej, caxu a'yan cha'taj siana'aj mua'aj je'ej pua'aj ja'uurej.

A'íj xu jin tyí'tyese'ej siaj sij tyámua' tyi-tyetyúucha'íj néijmi'caa jimi i tyeítýee.

¹⁸ Siata'aj a'yan huárinyij a'chu siaj a'yan tya'ajxié'vi'ra', siaj sij tyámua' huojomua'raj néijmi'caa i tyeítýee.

¹⁹ Nye'ihuáamua' mu nyaj já'muaxie've', caxu puéjtzij jatá'care'en i a'tíj tí je'ej pua'aj jamuáaruuj, sulu che' i Dios puéjtzij jaatá'an, ji'nye a'yaa pu tyé'yu'si' i yu'xarij jítze tíjin: "A'yaa pu nyéetzij tyí'nyaci'puaj nyaj puéjtzij jaatá'an a'íjci i tí je'ej pua'aj mua'uurej, nyáaj nu tyí'najchitan, a'yaa pu tyí'xaj i tavástara'."

²⁰ A'yaa pu ajta tyé'yu'si' tíjin: "Típua'aj í'cuataj a'íjna i tí muájcha'íire', pata'aj tyáacue'tyej, na'ríij ajta í'mu'uj pata'aj jájtyij jaatá'an, a'yaa paj huárinyij tí'íj a'ín huatóotyevi'ra'astaj."

²¹ Capáj tyi'tá'care'en tí a'ín mua'antyimué'tin i tí je'ej pua'aj een. Sulu pata'aj ja'antyimué'tin a'íjci tí je'ej pua'aj een a'íjci jime' i tí xá'pui'.

13

¹ A'yaa pu tyúuxie've' siaj néijmi'i hua'rá'astijre'en a'íjma i maj tyi'tíj jin antyúumua'reej. Ji'nye Dios pu a'yan tyihua'antyíhuoo, a'íi pu a'íjna jin tyihua'antyáaruujtyej.

² A'íj pu jin a'íjna i tíquee huá'astijre' a'íjma i maj tyityatatyíj, a'íj pu quee já'astijre' je'ej tí i Dios tyu'ta'íjtaca'. Majta i maj quee tyá'astej maj a'yan huárinyij, puéjtzij pu hua' japua rávesij,

³ Ji'nye i maj tyityatatyij camu a'ijna jin antyúumua'reej mej mij a'íjma muaritya'aj i maj tyámua' tyityetyúucha'ij, sulu a'íjma i maj je'ej pua'aj tyityetyúucha'ij. ¿Nyij a'yan petyá'xie've' paj quee huá'tziinye'ej a'íjma i maj tyityatatyij? Tyámua' paj tyityía'cha'íj aj mu mij i maj tyityatatyij jamua'reeren paj quee tyi'tíj jin á'itzeere',

⁴ Ji'nye a'íi pu i Dios jimi tyi'tyéjvee tí'ij muáacha'íin. Ajta tipua'aj je'ej pua'aj petyi'tyíacha'íij, aj paj xaa hua'tzínnye'ej puá'mej, ji'nye a'íi pu a'ijna jin antyúumua'reej tí'ij puéjtzij muaatá'an, a'íj pu jin tyí'huiire' i Dios jimi, ta'aj ij Dios jitze ma'can puéjtzij huo'tá'an a'íjma i maj je'ej pua'aj tyityetyúucha'ij.

⁵ A'íj pu jin a'yan tyúuxie've' siaj hua'rá'astijre'en a'íjma i maj tyityatatyij, caxu a'íj siana'aj jime' mej mij quee puéjtzij jamuaata'an, sulu siaj sij a'ijna jin ja'rá'astijre'en i Dios.

⁶ A'íj xu jin mua'aj tyí'najchitaj a'íjma jimi i maj tyityatatyij, ji'nye a'íi mu tyí'huiire' i Dios jimi, majta a'náj tina'aj a'ijna jin antyúumua'reej.

⁷ Siata'aj a'yan tyihuo'tá'an séej siajta séej je'ej tí tya'ráanajchi. Tipua'aj petyé'cha'íj a'íjma jimi i maj tyityatatyij, pata'aj tyihuo'nájchitye'en, na'ríj mámuajijve'ej a'íjci jime' i paj tyí'to'racaa, pata'aj pajta a'íjci jin tyu'nájchij, pajta tzáahuatyira'aj jimi tyí'cha'íj a'íjma jimi i tí a'yan tyúuxie've' paj huo'tyátzaahuatye'en, pajta tyámua' tyihuo'tyéjeevej a'íjma i tí a'yan

tya'ráanajchi paj tyámua' tyihuo'tyéjeevej.

8 Caxu a'tíj tyé'cha'íire'ej, a'íj xu'uj jin tyóocha'íiria'aj siaj tyámua' naa tyityahuóoxie've'en séej jamuán siajta séej, ji'nye a'íjna i ti hua'xie've' i juxa'aj tyeítýee a'íi pu arí ja'rá'astej a'íjci i nyúucarij i maj jin tyí'ijta.

9 A'yaa pu tyá'xaj i nyúucarij i maj jin tyí'ijta tíjin: “Capáj axana'ciria'aj, capáj tyí'tyacui'caj, capáj tyí'nahua'aj, capáj tyí'nyacua'tzaj”, néijmi'i i nyúucarij ti a'yan een, ajtáhua'aj i séecan, séej pu'uj jitze i nyúucarij aróo'astej i ti a'yan tyé'yu'si' tíjin: “Pata'aj a'yan tyá'xie've' i axa'aj tyévij, ja'yájna pati'ij asíij tyíaxie've'.”

10 A'íjna i ti tzáahuatyira'aj jin hua'xie've' i juxa'aj tyeítýee, capu je'ej pua'aj huá'uurej i tyeítýee, a'íj pu jin néijmi'i ará'astej i nyúucarij i maj jin tyí'ijta.

11 Siata'aj néijmi'i tyámua' tyí'mua'reeriaj je'ej ti ijíj tyí'een, siajta a'yan tyá'mua'reeriaj ti a'yan tyúuxie've' siaj atanyéjnye'rij. Ji'nye pu'rij jéetze' véjri' a'ájna xicáara' tí'ij jitzán Dios tajapuá huatányuusij, quee xu a'yan tyi'véjri'tacaj tyati'ij anaquéej tyá'antzaahuaj.

12 Pu'rij jéetze' huatíca', a'íj pu jin arí véjri' a'ájna xicáara' ti jitzán i Ciríistu' tajapuá huatányuusij, a'íj pu jin, tyiche' tyu'tapuá'citaj a'íjci i ti je'ej pua'aj tyí'een, je'ej tyaj anaquéej rijcaa, tyiche' a'íjci jin eecátanaj i tatzárij, a'yájna tí'ij i xantáaru' tyámua' tyúu'uurej tí'ij huatyényo'se'en.

13 Tyiche' tyámua' tyityetyítacha'íij mati'ij i

tyeítýee i maj nyéeri'iste' maj huaci'ij. Tyiche' quee hua' jamuán tyí'ye'estyaj i tyeítýee, tyajta quee ta'ruj, tyajta quee tyí'xana'cire'ej, nusu tyaj tanyo'si'tye'ej tajímua'aj, tyiche' quee á'tachueeria'aj.

¹⁴ Sulu tyiche' tyámua' tyityahuátacha'iin a'yájna ti'ij tyi'tyúucha'iica'aj i tavástara', a'íjna i Jesús ti ajta Ciríistu' pué'een, caxu a'íjna huocaj siaj sij a'íj ará'astijre'en i ti je'ej pua'aj een i ti já'muatzajta' eerányinyii.

14

I maj quee jéehua uhuácaca'nye' i maj jitzán tyá'tzaahuatye'

¹ Siata'aj tyámua' tyeetyéjeevej a'íjci i ti quee xu jéehua tyá'tzaahuatye', caxu tyé'ihuo'raj je'ej ti a'íin tyi'tíj tyojó'itej.

² A'yájna mati'ij i séecan tyí'mua'tzej ti i Dios tyi'tá'caa maj néijmi'i tyú'cua'nyij, majta séecan i maj quee tyámua' tyá'mua'reej je'ej ti tyí'een i Dios jimi, a'íj mu'uj tyí'cua'caa i ti tye'ejnyéj a chóota'.

³ A'yaa pu'ij, a'íjna i ti néijmi'i tyí'cua'caa, che' quee a'yan tyá'xaahuataj a'íjci i ti quee néijmi'i tyí'cua'caa, ajta a'íjna i ti quee néijmi'i tyí'cua'caa, che' quee ajta je'ej tyá'xajta a'íjci i ti néijmi'i tyí'cua'caa, jí'nye Dios pu arí jaataxié'vej.

⁴ ¿A'tanyíj muáaj papu'é'een pej pij je'ej pua'aj tyá'xajta a'íjci i ti séej jimi tyí'hui're'? Tipua'aj tyámua' huárinyij nusu quee, a'íi pu'uj jamua'reej i ti tyé'ijtye'. Ajta a'íi pu tyámua'

tyu'tyá'itzeere'ej, ji'nye tavástara' pu jaayítin tí'ij tyámua' jáa'uurej.

⁵ Ajtáhua'aj a'yájna, séecan pu a'yan tyé'miteeraste' tí séej xicáj tya'tácaj tí jéetze' juxie've' i Dios jimi, quee máaj séecan xicáara' jitze, majta séecan a'yan tyí'mua'tzej tí juxa'aj na'aj tyi'tápuaapua'rej néijmi'i i xicáj. A'yaa mu mij jujímua'aj tyámua' naa tyá'mua'reej tyi'táj maj jitzán tyá'tzaahuatye'.

⁶ A'ájna i tí a'yan tyé'miteeraste' tí séej i xicáara' jitze jéetze' juxie've', a'yaa pu a'ájna jin tyeetyátzaahuatye'sij i tavástara'. Ajta a'ájna i tí néijmi'i tyí'cua'caa, a'yaa pu ajta ricáj i tavástara' jimi, ajta a'ájna jin tyé'tyojtzi're' i Dios, ajta i tiquee néijmi'i tyí'cua'caa, a'yaa pu ajta a'ájna jin tyí'cua'caa i tavástara' jimi, ajta pu a'ájna jin tyé'tyojtzi're' i Dios.

⁷ Néijmi'i tyati'ij tyana'aj pua'máj yan séejre' capu a'táj jusíj júurij, capu ajta a'yan tyí'mui'nyij je'ej tí jusíj tya'ajxié'vi'ra'.

⁸ Tipua'aj tyajúurij, a'yaa tu tyí'tyajuurij tyej tyij tavástara' huatyáhuire'en, na'ríj táacui'nyij, a'yaa tu tyajta tyí'tyacui'nyij tavástara' jitze ma'can. A'áj pu jin tipua'aj tyajúurij nusu táacui'nyij, tavástara' tu jitze ajtyáma'can.

⁹ A'áj pu jin i Ciríistu' tajitzé ma'can huamuí', ajta je'en huatájuuriaca' tí'ij hua' vástara' pue'éenye'ej tá'ra'nyij a'ájma i maj meríj huácuij, ajta a'ájma i maj júurij.

¹⁰ ¿Ji'nye pej pij muáaj je'ej pua'aj tyá'xaj a'ihuáara'? ¿Ji'nye pej pij pajta tyá'xaahua'j?

Néijmi'i tu huatátasejrataj i Dios jimi, ta'aj ij a'ín to'xíjtye'en ityájma.

11 Ji'nye a'yaa pu tyá'xaj i yu'xarij jitze tijin:
A'íjna jime' i nyaj jin júurij, a'yaa pu tyí'xaj i
tavástara'

néijmi'i mu nye jimi tyítunutaxi'ij,
majta néijmi'i tyaatatyójtzi're'ej i Dios.

12 A'íj tu jin néijmi'i a'yan tyaataxájta i Dios jimi
je'ej tyaj tyi'tíj jin huaríj.

13 A'íj pu jin tyiche' quee tajímua'aj je'ej pua'aj
tyí'taxajtaj. Sulu tyiche' tyámua' huáta'uurej ti'ij
quee síj ta'ihuáara' tyi'tíj jin ootyá'itzeere'en,
nusu yó'rieenyij i ti jin tyá'tzaahuatye'.

14 Tyámua' nu nyáaj tyá'mua'reej tiquee
tyi'tíj séejre' ti je'ej pua'aj tyú'uurej, nyáaj nu
tyá'tzaahuatye' i Jesús jimi ti tavástara' pué'een.
Ajta tipua'aj síj a'yan tyí'mua'ajcaj ti je'ej pua'aj
tyú'uurej, a'íj pu jimi quee tyámua' éenye'ej
ja'mej.

15 Ajta tipua'aj a'íjna jime' je'ej paj muáaj
tyi'tíj tyí'cua'caa je'ej pua'aj tyo'tóomua'tyij
a'ihuáara', a'íj paj jin quee che' jaxie've'
a'ihuáara'. Che' quee a'cueráj jin jo'huí'tzi'in
ja'ihuáara', ji'nye Ciríistu' pu'rij jitzán ma'can
huamuí'.

16 Caxu sij tyi'tá'care'en ti je'ej pua'aj tyú'rinyij
i ti naa tyí'een ja'mua jimi.

17 Ji'nye a'ájna jo'tíj i Dios tyejé'ijtaj, capu
a'ín juxie've' je'ej tyaj tyi'tíj tyí'cua'caa nusu
je'ej tyaj tyí'tyeya'caa, sulu tyej tyámua'
tyí'tyechajcaj, tatatyámua've'ej a'íjna jitze
ma'can i júuricama'ra' i Dios.

18 A'íjna i ti a'yan tyá'huiire' i Ciríistu', tyámua' pu tyé'tyojtzi're' i Dios, majta i tyeítýee a'yaa mu tyá'mua'reeren ti a'íin tyámua' tyí'tyevij.

19 A'íj pu jin tyiche' a'yan tyityeetyátaca'nyej tyej tyij tyámua' tyi'tyítacha'íij, ajta tyej tyij tajímua'aj huatyátahuiire'en.

20 Caxu yó'jipuan i muárie'ria'ra' i Dios a'íjna jime' je'ej siaj tyi'tíj tyí'cua'caa. Ji'nye néijmi'i pu i cue'ráj tyámua' tyí'een, a'íi pu'uj quee xá'pui' tìpua'aj tyi'tíj puáacua'nyij ti séej jimi je'ej pua'aj een, ji'nye a'íi pu yo'riésij i ti jin tyá'tzaahuatye'.

21 A'íj pu jin jéetze' tyámua' siaj quee hue'ra'aj cua'ajcaj, na'ríij siaj nahuáj ya'caj, siajta quee tyi'tíj je'ej uuriaj tì'ij quee síj já'mua'ihuaara' tyi'tíj jin ootyá'itzeere'en.

22 A'íjna i paj jin tyá'tzaahuatye', a'yaa pu tyúuxie've' paj a'íjna jin tyámua' eenye' i Dios jimi. Che' huatóotyamua've'en a'íjna i tiquee jumua'tzíra'aj jin óoxijtye' je'ej ti tyi'tíj jin ricij.

23 Ajta i tiquee tyámua' tyá'mua'reej ti a'yan tyí'xa'pui' ti tyi'tíj huácua'nyij, ajta je'en jáacua'nyij a'íj pu jin je'ej pua'aj tyo'tóomua'sij, ji'nye a'íi pu quee tyá'tzaahuatye' tyí'cua', ajta tyi'tíj tina'aj ti jin a'tíj a'yan rijcaj quee tyámua' tyá'tzaahuatye'ej, a'íj pu jin ootyá'itzeere'ej i Dios jimi.

15

Tyej tyámua' tyi'tyítacha'íij i taxa'aj tyeítýee jimi

¹ Tyajta i tyaj jéetze' tyámua' tyá'tzaahuatye', tyiche' tyámua' tyihuo'tyéjeevej a'íjma i maj quee xu a'chu tyá'tzaahuatye', tyajta quee a'íj tyana'aj huocaj je'ej ti ityájma tyita'ránajchij.

² A'yaa pu tyúuxie've' tyaj néijmi'i tyámua' tyihuo'tyáhuüre'en i taxa'aj tyeítjee, tyajta tyámua' tyihuo'tyáhuüre'en, tyej tyij néijmi'i tyámua' eenye'.

³ Ji'nye capu i Ciríistu' a'yan tyá'huocaa'aj je'ej ti a'íin tyá'xie'va'ca'aj, sulu a'yaa pu a'íj jimi tya'róo'astej je'ej ti tyé'yu'si'huaca'aj i yu'xarij jitze ti a'yan tijin: "A'íjna i maj jin je'ej pua'aj tyaja'muaxajtaca'aj nyéetzij pu naaci'ij."

⁴ Néijmi'i i ti anaquéej ooyú'si'huaca' i yu'xarij jitze, a'yaa pu tyo'yú'si'huaca' ti'ij tyitáamua'tyej, ti'ij a'íin ca'nyíjra'aj tatá'care'en, tyej tyij tyooj tyi'ijchó've'ej i Dios jimi.

⁵ Ajta i Dios i ti ca'nyíjra'aj tyu'tá'caa ti ajta tyámua' tyitaatyéjeevij, a'íi pu jamuaatyáhuüre'ej siaj sij tyámua' ja'huóomua'raj séej jamuán siajta séej, a'yájna siati'ij tyaari'rej i Ciríistu' jimi ti ajta Jesús pué'een,

⁶ siaj sij néijmi'i tyaatatyójtzi're'en i Dios i ti vástaria'ra' pué'een i tavástara', a'íjna i Jesús ti ajta Ciríistu' pué'een.

⁷ Siata'aj a'yan cha'taj siana'aj tyámua' tyityahuóoxie've'en séej jamuán siajta séej, a'yájna ti'ij i Ciríistu' mua'ajmaj tyajamuaataxié'vej, siata'aj sij tyaatatyójtzi're'en i Dios.

⁸ A'yaa nu tyajá'mua'ixaatye' ti i Ciríistu' a'íjna jin mujo've'mej ta'aj ij huo'tyáhuüre'en

a'íjma i maj Israel jitze ajtyáma'can ajta je'en a'yan tya'róo'astej je'ej ti i Dios tyihua'táratziiri' a'íjma i maj anaquéej huaséjre, ta'aj ij a'íjna jin huataséjre'en ti Dios aróo'astee je'ej ti tyi'tíj jin tya'tóorasij.

⁹ A'íj pu ajta jin mujo've'mej mej mij majta a'ímaj i maj séej chuéj japua já'ma'can tyaatatyójtzi're'en i Dios a'íjci jime' ti a'ín hua'ancu'vajxi, a'yaa pu tyé'yu'si' i yu'xarij jitze tíjin:

A'íj nu jin tyimuaatatyójtzi're'ej hua' tzajta' i maj séej chuéj japua já'ma'can, nyajta a jitze ma'can tyu'táchuiicaj.

¹⁰ Ajtáhua'aj pu a'yan tyá'xaj i yu'xarij tíjin: Siata'aj huatóotyamua've'en hua' jamuán i maj tyeítyeristyamua'me'en pué'een i Dios.

¹¹ Ajtáhua'aj pu séej jitze a'yan tyá'xaj tíjin: Néijmi'i i siaj a'yan huacháatimee i cháanacaj japua,

siata'aj tyaatatyójtzi're'en i tavástara'.

¹² Ajta i Isaías a'yaa pu tyo'tyéyu'xaca' tíjin:

Síj pu eerányesij a'íjci jitze i Jesé, a'í pu'ij tyihuo'ta'íjtye'sij néijmi'caa i maj séej chuéj japua já'ma'can, majta a'ímaj, a'yaa mu jitzán tyi'ijchó've'sij tíij a'ín hui'rátoonyij.

¹³ Ajta a'íjna i Dios i ti ca'nyíjra'aj tatá'caa tyej tyij jitzán tyi'ijchó've'ej, che' a'ín tyámua' tyajamuaatá'an siaj sij huatóotyamua've'en ajta jamuaatyápua'ritye'en mua'ajmaj mu siaj jitzán tyá'tzaahuatye' i tavástara', che'

a'ñin ajta tyámua' jamuáa'uurej siaj sij jéetze' jitzán tyi'ijchó've'ej a'íjci jitze xa'rooca'nyéej i júuricama'ra' i Dios.

14 Nye'ihuáamua', a'yaa nu tyámua' naa tyá'mua'reej siaj néijmi'i tyámua' tyityetyúucha'ij séej jamuán siajta séej, siajta jaayi'tin siaj tyámua' tyi'huóo'ixaatye'en séej siajta séej,

15 nyajta a'íjna jitze i yu'xarij a'yaa nu tya'huányaca'an nyaj a'yan tyajamuaatayú'se'en tyi'tíj jime', siaj sij quee yó'hua'nan. A'yaa nu ricij siaj sij quee yó'hua'nan ti i Dios juxié'vi'ra' a'íjna jin tyina'antyáaruujtyej,

16 nyej nyij jaatyáhuüre'en i Ciríistu' ti ajta Jesús pué'een, nyajta je'en nyúucaria'ra' i Dios huo'té'exaatye'en a'íjma i maj séej chuéj japua já'ma'can, mej mij majta a'íimaj a'yan éenye'ej muá'ra'nyij ti'ij mu'vejrij ti síj jaatyájtoo i Dios jimi, a'íjna jitze ma'can i júuricama'ra' i Dios.

17 A'íj nu jin huatányaci'puaj nyej nyij huatányetyamua've'en a'íjci jimi i Ciríistu' ti ajta Jesús pué'een a'íjci jime' nyaj a'yan tyá'huüre' i Dios,

18 ji'nye canu á'nyaca'nyej nyej nyajtáhua'aj séecan tyi'tíj jamuáa'ixaatye'en, sulu a'íj nu'uj je'ej ti i Ciríistu' arí tyú'ruuj nye jitze ma'can, mej mij a'íimaj i maj séej chuéj japua já'ma'can majta ja'antzaahuatye'en i Dios. A'yaa mu a'íjna jin tyá'antzaahuaj je'ej nyaj tyihuó'ixaaj, ajta je'ej nyaj tyi'tíj jin ricij,

19 a'íjna jime' je'ej nyaj tyí'muarie' i maj jin je'ej tyo'taséj, ji'nye a'íj nu jitze arányaca'nyej

í júuricama'ra' í Dios. A'íj nu jín néijmi'que' nyeríj huó'ixaaj í nyúucaria'ra' í Ciriístu', tí'ij na'aj a'áa maj huacháatimee a Jerusalén, 'asta nyana'aj quee a'áa ja'tanyéj a'áa tí huataca'aj a Iliriaj.

²⁰ A'yaa nu nyij a'náj tina'aj tyí'tyese' nyej nyij tyihuó'ixaatye'en jo'maj quee xu a'náj yó'namuajri' í nyúucaria'ra' í Ciriístu', nyej nyij quee a'íjci jitze ootyényechenyij jo'tíj arí síj tyojo'muáriej,

²¹ sulu nyej nyij a'yan huárinyij je'ej tí tyé'yu'si' í yu'xarij jitze tíjin:

A'íi mu jaséjran a'íjci í tiquee eexúj a'tíj huo'té'exaa,

majta yo'itéej muá'ju'un a'íjci í maj quee xu a'náj jáanamuajri'.

Pablo pu jaaxá'pui'intarej tí'ij a'áa jo'mej a Roma

²² A'íj nu jín quee pu jáaruuj nyej nyij jamojo'tyéesej, tyij nyajta nyeríj mue'tíj a'yan tyaaxá'pui'intarej nyaj a'áa ja'tanyéj ja'mua jimi.

²³ Ajta íjij nyaj nyeríj antyínyaci'ij í nyaj jín tyu'muáriej a'yaa tí huataca'aj, nyajta nyeríj a'chu pua'an nyinyi'ra'aj á'tyeej nyaj a'yan tyá'xie've' nyaj jamojo'vá'muaarej,

²⁴ a'yaa nu tyá'xie've' nyaj a'yan huárinyij nyati'ij a'áa jó'me'en a España. Ajta nyati'ij jamuaaséeran, tyij nyajta quee a'chu á'tyeeren, a'yaa nu tye'ejchó've' siaj mua'aj naatáhuüre' nyej nyij huame'en jó'nyej nyooj jó'yi'ij.

25 Ajta ijíj a'áa nu jo'ma'aj na'mej a Jerusalén nyej nyij huo'táhuire'en a'íjma i ta'ihuáamua' i maj a'áa ja'chej.

26 Ji'nye i maj Macedonia huacháatimee, majta i maj Acaya ja'chej, a'yaa mu juxié'vi'ra' jin tyaaxá'pui'intarej maj huo'táhuire'en a'íjma i ta'ihuáamua' i maj quee je'ej tyéejviicue' i Jerusalén maj ja'chej.

27 Juxié'vi'ra' mu jin a'yan tyaaxá'pui'intarej, ajta a'yan hua' jitze tyuuxié'va'caj maj a'yan huárinyij, ji'nye a'ímaj i maj Israel jitze ajtyáma'can a'yaa mu tyihuo'táhuire' a'íjma i maj séej chuéj japua já'ma'can, a'íj mu jin majta a'ímaj i maj séej chuéj japua já'ma'can a'yan tyityatóoci'puaj maj huo'tyáhuire'en a'íjma i maj Israel jitze ajtyáma'can.

28 A'yaa nu nyij nyati'ij huo'tatuíre'en i maj tyu'tá' i ta'ihuáamua', aj nu nyij a'áa jo'ma'aj na'mej ja'mua jimi, nyajta je'en a'áa jo'ma'aj na'mej a España.

29 A'yaa nu tyá'mua'reej ti a'yan tye'mej nyati'ij a'áa jó'me'en ja'mua jimi ti i tavástara' néijmi'i jin tyámua' tyitaatyátoosij capu ij tyi'tíj ta'itziitya'aj ta'mej.

30 A'yaa nu jéehua tyaja'muahuaviiij nye'ihuáamua' a'íjna jitze ma'can i tavástara', a'íjci i Jesús ti ajta Ciríistu' pué'een, nyajta a'íjci jitze ma'can i júuricama'ra' i Dios, siaj jéehua jahuaviiraj i Dios nyéetzij jime'.

31 A'yaa xu tyá'huaviiraj i Dios ti'ij a'ín nyaj japua huatányuunyij a'íjma jimi i maj quee já'astijre' i tavástara' i maj Judea huacháatimee,

siajta a'íjna jin jahuoocaj mej mij tyámua' tya'ancuriáan i maj Jerusalén já'ma'can i nyaj jin huo'táhuüre'ej,

³² a'yaa xu huárinyij nyej nyij a'áa jó'me'en ja'mua jimi tipua'aj i Dios a'yan tyi'tá'care'en, tyej tyij huátatyamua've'en, tyajta ca'nyíjra'aj huatáta'an séej tyajta séej.

³³ Che' i Dios tyámua' tyajamaatyápua'ritye'en mua'ajmaj. Che' a'yan tyá'ra'nyij.

16

Pablo pu hua'tyojtye' a'íjma i ti huá'muajtye'

¹ A'yaa nu tyajá'mua'ixaatye' ti i ta'ihuáara' ti íiti' a'íjna i Febe tyámua' naa tyihuá'huüre' a'íjma i maj jusi'rii a'ájna a Cencrea.

² Siata'aj tyámua' tyaataxie've'en tavástara' jitze ma'can, a'yájna ti'ij tyi'tyéevijtij i tajimí i tyaj i Dios jimi tyá'tzaahuatye', siajta néijmi'i jin jaatáhuüre'en i ti tyá'itziitye', ji'nye a'íi pu arí mui'caa huatyáhuüi i tyeítyee, ajta pu nyéetzij naatáhuüi.

³ Siata'aj jaatatyójtje'en a'íjci i Priscila, siajta a'íjci i Aquila, a'íi mu nyaj jamuán tyí'muarie' tyej tyij néijmi'i jaatyáhuüre'en i Ciríistu' ti ajta Jesús pué'een.

⁴ A'íi mu jéehua huápuí'ij naatáhuüi, majta a'íj jin tin huácuij, nyajta quee nyáaj nyana'aj hua'tyojtye', sulu majta mu a'íimaj i maj séej chuéj japua já'ma'can i maj majta tyá'tzaahuatye'.

⁵ Siata'aj siajta huo'tatyójtje'en a'íjma i maj a'áa jóosi'rii jo'maj ja'chej i Priscila, ajta a'íjna i Aquila. Siata'aj siajta jaatatyójtje'en a'íjci i Epéneto, i ti a'áa ja'chej a Asia i ti anaquéej tyá'antzaahuaj i Ciriístu' jimi.

⁶ Siajta a'íj huatatyójtje'en i Maríia, i ti arí jéehua tyu'muáriej ja'mua jimi.

⁷ Siata'aj huo'tatyójtje'en i Andrónico, siajta i Junias, a'íi mu nyaj jamuán huanámi'huaca', majta tyámua' naa tyihuá'muajtjej a'íimaj i maj tamuáamuata' japuan hua'puaj ará'asej, ji'nye a'íi mu anaquéej tyá'antzaahuaj i Ciriístu' jimi nyeqee nyáaj.

⁸ Siata'aj jaatatyójtje'en a'íjci i Ampliato, i nyaj jéehua jaxie've' i tavástara' jimi.

⁹ A'yaa xu siajta tyaatatyójtje'en a'íjci i Urbano i ti tajamuán tyí'muarie' i Ciriístu' jimi, siajta a'íjci i Estaquis, i nyaj nyajta jéehua jaxie've'.

¹⁰ Siata'aj jaatatyójtje'en i Apeles, a'íi pu jéehua á'viicue're' i Ciriístu' jitze ma'can, siajta a'íjma i maj Aristóbulo jamuán ja'chej.

¹¹ Siata'aj jaatatyójtje'en i nye'ihuáara' Herodión, siajta i maj Narciso jamuán aja'chej i maj tyá'tzaahuatye' i tavástara' jimi.

¹² Siata'aj jaatatyójtje'en a'íjci i Trifena, siajta a'íjci i Trifosa, i maj tavástara' jitze ma'can tyí'muarie', siajta a'íjci i Pérside, i jéehua huápu'i'ij arí tyu'muáriej i tavástara' jimi.

¹³ Siata'aj jaatatyójtje'en a'íjci i Rufo, tavástara' ti ja'antyíhuoj, siajta i náanajra', ji'nye a'íi pu a'yan tyináacha'ij ti'ij nyaj yójra' pué'eenye'.

14 Siata'aj jaatatyójtje'en i Asíncrito, siajta i Flegonte, siajta i Hermas, siajta a'íjci i Patrobas, siajta i Hermes, siajta a'íjma i ta'ihuáamua' i maj jamuán aja'chej.

15 Siata'aj siajta a'íj huatatyójtje'en i Filólogo, siajta i Julia, siajta i Nereo, siajta i ihuáaria'ra' ti íiti', siajta i Olimpás, siajta néijmi'caa a'íjma i maj hua' jamuán a'áa ja'chej i maj majta tyá'tzaahuatye'.

16 Siata'aj huatóotyójtje'en séej jamuán siajta séej je'ej ti tyi'tyéevijtij i Dios jimi. Néijmi'i i maj jusi'rii i Dios jimi, a'íi mu yajá'muatyójtje'.

17 Nye'ihuáamua', a'yaa nu tyajá'mua'ixaatye' tzáahuatyi'ra'aj jime', siaj tyámua' tyihuo'séj a'íjma i maj quee xá'pui' ricij i maj majta meríj ajtacíj a'íjci jitze je'ej tyaj tyajamuaamuá'tyej. Siajta ajtáciinyej a'íjma jimi,

18 ji'nye camu a'íimaj jahuíire' i tavástara' ti ajta Ciriistu' pué'een, sulu a'yaa mu'uj je'ej maj jujímua'aj tyá'xie've', a'yaa mu mij tyi-huá'cuanamuaj nyúucarij jime' ti naa namuajre' a'íjma i tyeítjee i maj quee tyi'tíj jin á'itzeere'.

19 Néijmi'i mu a'yan tyá'mua'reej siaj tyámua' tyá'tzaahuatye' i tavástara' jimi. A'íj nu jin nyetyamua've' ja'mua jime', nyajta a'yan tyá'xie've' siaj sij tyámua' tyityetyúucha'ij je'ej ti tyi'tyéevijtij i Dios jimi, caxu siaj sij je'ej pua'aj rijcaj,

20 a'yaa pu'ij i Dios i ti tyámua' tyitaatyápua'rij jiye'tzín tye'entyipúa'ritye'sij a'íjci i tyiyáaru' tí'ij jamuaata'an siaj néijmi'i jin tyu'tyámue'tin.

Che' i tavástara' a'íjna i Jesús tyámua' tyajamaatyátoonyij.

²¹ A'íi pu yajá'muatyojtye' i Timoteo, i ti nyaj jamuán tyí'muarie', ajta a'íjna i Lucio, ajta i Jasón, ajta i Sosípater i maj nyaj jamuán yahuatyíj.

²² Nyajta nyáaj, Tercio nyaj pu'é'een, i nyaj á'yu'xaj a'íjci i yu'xarij i Pablo jitze ma'can, nyáaj nu nyajta já'muatyojtye' i tavástara' jitze ma'can.

²³ A'íi pu ajta yajá'muatyojtye' i Gayo. I nyaj jimi yahuácaj, a'íi pu tyámua' tyihuá'cha'ij néijmi'caa i maj a'yaa jusi'rii.

²⁴ Yapu ajta já'muatyojtye' a'íjna i Erasto i ti a'íjna jin tyí'tyéjvee ti túmii siire'ej, ajta a'íjna i ta'ihuáara' Cuarto.

I ti jin ja'antypuá'rij

²⁵ Tyiche' tyaatatyójtzi're'en i Dios, i ti jaayí'tin ti ca'nyíjra'aj jamuaata'an siaj sij tyámua' tyityetyúucha'íij a'yájna nyati'ij nyeríj tyajamaá'ixaa a'íjci i nyúucaria'ra' i Jesús ti ajta Ciriístu' pu'é'een. A'íjna i nyúucarij, a'íi pu a'íin pu'é'een i ti Dios jin arí tyitaataséjra i ti aviitzi'huaca'aj jájcuaj imuáj tí'ij quee xu séeria'caj i cháanacaj,

²⁶ ajta ijíj i Dios arí taataséjratyej a'íjna jitze je'ej maj tyo'yú'xaca' i maj jitzán ma'can tyí'xaxa'ta'aj, je'ej ti i Dios i ti jusén jime' séejre' tyu'ta'íjtaca'. A'íjna i ti aviitzi'huaca'aj, pu'ríj huataséjre néijmi'que' i cháanacaj japua, mej mij jitzán tyá'antzaahuatye'en majta ja'rá'astijre'en.

²⁷ Tyiche' jusén jime' tyé'tyójtzi're'ej ì Dios ì ti néijmì'i jìn antyúumua'reej, tyiche' ì Jesús ti ajta Ciriistu' pué'een jitze ma'can tyaatatyójtzi're'en. Che' a'yan tyá'ra'nyij.

Cora, Santa Teresa
Cora, Santa Teresa: I nyúcarij ti jájcua ti a'ijna
á'xaj i Tavástara' i Jesús ti Ciriistu' pue'een ajta
Salmos New Testament+

copyright © 2016 Wycliffe Bible Translators, Inc.

Language: Cora, Santa Teresa

Contributor: Wycliffe Bible Translators, Inc.

All rights reserved.

2025-05-01

PDF generated using Haiola and XeLaTeX on 30 Apr 2025 from source
files dated 1 May 2025

4f03662f-a4e0-5c7c-a13b-0b7002b5b8f6